

Romihyaapi Utipiho

Poriho Romihyaapi Utipimandi Kimandi Jipatipaindihande

Kimandi Romihyaapi Utipimandapi Nesipihande

Awaisihomi piwiha awusaitandi natausaasihi piwiha nesi naisiho Poriho utipihaiwa Autaahaatihomi piwahaaiwa 13, 14 kiyahaiwa jipatipiyataise. Romihyaapihauni Korindihiyaapi utipihandi jihanduni kapihanduni Tesaronaikaahiyaapihanduni ami Timotehopihanduni Taitusihopihanduni Pirimonihopihanduni saiwa Poriho jipatipiyataise. Aihi ami isihya usa gwinyapenawaawi piwiha Ipiruhiyaapiha Poriho kimiko jipatipiyahaare tiwi gwinyaawaayopo.

Romihyaapi Piwiha Napimasataise

Poriho utipiho kimo jipatipaisimopi tanyaaha nesipati ausaati katisiha (1:1-17)

Woho apopaati sawaho sawahaami andititindihanda asitimatitandihandi windi namaitaise tisiha (1:18-3:20)

Nyahi asitimatitihahandi naitihaahandami tanyaaha nyahi Kopi biyaati giwunyaahotihandahe tisiha (3:21-4:25)

Nyahi Jisaasihoaisaati timaamaitaati kiyaaninihi bindihaawi asitimatitihahandami daihira mmonainja nutihaawo tisiha (5:1-8:39)

Ipotihura Autaahaatiho Isiraherihyai japihi gaatati numwaahonihi kiya napiwi kopi giwunyaitaapo tisiha (9:1-11:36)

Giwunyaahohiyihyaami kaiwi bimitaatiwihiretapi katisiha (12:1-15:13)
Poriho isihya usai asisiha gaahure undati komi piwiha owemasitihandapiha (15:14-16:27)

Autaahaatiho Otipipati Naninyati Natanoasindihandapi Katitandiyoy

1 ¹ Nisi naisihyaati nisataiwi Kiraisihopi giwunyaahohiyihyaati aunahipati awaipati taunihandi Romihanda bimohiyihyaate, nini

Porihonini sapi utipimandi kimandi jipatipiyataayo. Iyataati nini Kiraisi Jisaasihomi nehi otipipatihonini ko kahapaamapipa katati kiyaunjati kaiwaiwaapiha piwiha gaaha waniha kopi ausaati isihiyai kaunditandi Autaahaathi gaataati nanimaati nanimihanati natanoaasisihonine.

²Iyataati Piwiha Waniha Gaaha sa Jisaasiho katati kaiwaiwaapiha Autaahaathi jihura komi piwiha atiwi nepi ausaahohiyihiya piropetihyaamihetapi saiwa siyati noaipaitaise tati timanati jihi katih komi piwiha jihaathi jipatipindisihaare. ³Iyataati sa piwa nehi Autaahaatihomi Mwaahopaahihitahaare. Iyataati ami ko noipati utaahoematindihandih Daawitihomi mwaaya satoyaami jitipatetapi noaipataise. ⁴Iyati ami ko Autaahaatihotindihandih Autaahaathi komi Itipihomi watipihandisati animwaahipatombi koaisi ahowimati numwaataati kandaahi kopi satati akitinihi Autaahaatihomi Mwaaho watipihandi apipaahi awaindahandisahore tati isihiyaisi neti nunjataise. Iyataati so animwaahipatombi nepaso nyami Awaisiho Jisasi Kiraisihore. ⁵Iyati ko ningi anditiniwati komi otipipati piwiha naninyati natanoaasisihonine. Sandi ko ningi sanindindi isihiya yapipati nahandaahiyaisi numwaati komi piwihaatihemasanihi kiya kopi giwunyaapi atiwi nepi komi piwiha gaaha wanihaami otitih pinuwi japepihiritatiwo. ⁶Ami sahi Romihandaahiyaatangisangi Jisasi Kiraisihomihiyaatimatitaatiwi Autaahaathiho aimi gaasatisawihiyaati maawe.

⁷Sahi Romihanda bimohiyihiyaati Autaahaathiho maariho nasamisawihiyaati komi apohipataatihapihiyaati komihiyaatimatitaatiwi aimi gaasatisawihiyaate, nyami Apiho Autaahaatihouni, nyami Awaisiho Jisasi Kiraisihouni sangi gaahati kasimi sahi andititiwi maariho napaisaatitanihi bimitaatiwihandi nasamitaise.

Romihandaahiya Kiraisihopi Giwunyaahohitihandapi Poriho Autaahaathihoai Gaahone Gaare Undataase

⁸Wuwani nini namasati sangi sandi kasatitandiyo. Sahi Jisasi Kiraisihopi baiwi giwunyaahohitihandapi isihiya piwiha nesi yapih nahanda gaamapi kanihauhi kandapi Jisasi Kiraisihomihetapi nisi Autaahaathihoaisi nini, “Kinyi gaahone gaare,” undataato. ⁹Iyataati nini Autaahaatihopi gaapundataahura sapi nasisoari gisunyaati gaapundatoandaayo. Siyonih Autaahaathiho komi Mwaahomi kata kaiwaiwaapi nini ausaahohitihandaahi anditati napamati otipipati kawisohiho ninjahosi akite titaise. ¹⁰Saindi ipotaataati wani sangisi nini napiti jasondandi gaapundataahura sawahomihandisi ko daihira wira daanuwitandaahi daanuwitandi nunjenataayo. ¹¹Sandi ami sangisi napiti jasoniti Autaahaatihomi Itipihomihaiwaapi sangi jatatananiti anditisaiwitandihandi nasamitandi nini apipaahi maaritataate. ¹²Napisanihi mmoatanaati sahi Kiraisihopi giwunyaahohitihandi ningisi nitatamanihonih

ami nini Kiraisihopi giwunyaahohitihandi sangi neti jatatanitandando. Iyonihni ami ususaanangi nyami kopi giwunyaahohitihandi kandi anditisaihonihi ami nyahi ususaani anditititihahandi naitihaawo. ¹³Nisi naisihyaati nisataiwi Kiraisihopi giwunyaahohiyihyaate, kimandi sahi baiwi gwinyaapise, nini sangisenda napitandi taahiwaiweti gwinyaataahandi kandi ami kahapaamapipa wapa jinjahira nanisapusihni namaaso. Isihyaati Judaahiyaami dawaataati bimohiyihyaatami isihya aunahipa wiwaraahiyaisi Kiraisihopi giwunyaataatiwi komi piwihaatihemahohipatamataindi ami napiti samihatihni naasaipiti kati kaitando.

¹⁴Iyataati nisi ikwiraatihni otipipati awaipati naanjihandi isitihonine, isihya nahatiyaisi Jisaasiho katati kaiwaiwaapiha piwiha ausaati kaunditandando. Isihya amitihni gaaha owehiya nahiriwi moniwi yamwaasiha anipataatihni bimohiyiyaisuni ami isihya amitihni gaaha gwinyaapi mmoniwi awaiwaiwa kaiwi bimohiyiyiyaisuni Autaahaatihomi piwiha kaunditandando. ¹⁵Otipipati siyahaiwa ikwiraatihni ahinotihihoninisi ami sandi kandapi sahi aunahipa awaipati Romihanda bimohiyihyaatangisangi Kiraisihopi piwiha ausaati kasatitandi nini apipaahi awaindihandi asakaindi maaritayaoy.

Piwiha Gaaha Waniha Jisaasiho Katati Kaiwaiwaapiha Isihyai Japihi Numwaitandi Autaahaatihomi Watipihande

¹⁶Piwiha Jisaasiho katati kaiwaiwaapihaatihni nisi maariho ambipati ahiyati anitindi isiwatataayo. Ami ka isihya Kiraisihopi giwunyaasaihiihiyaisi japihi numwaitandi Autaahaatihomi watipihanditihni. Piwiha ka Autaahaatihomi watipihandi namasati Judaahiyaamihatihni noaipati ami kiyaami dawaataati bimohiyihiyaisangi maawi japihi numwaitandihatihni. ¹⁷Iyati ami piwiha sa ka Autaahaatihni isihiyaisi sahi nisi ndiheti titihyaati saasanotahiyaate, unditandihandi neti siyati ausaimanataise, isihya Kiraisihopi giwunyaahohitihandaahihni Autaahaatihni kiyaisi sahi titihni saasanotahiyaate, undataase. Ami kiya kiyaanihi Kiraisihopi giwunyaapi naisaihaahi Autaahaatihni sahi saasanotahiyaate undindihandi kandinihi ahotimi nutaise. Ami kimandi kandapi Autaahaatihomi piwiha jipatipindisiha wa satise:

“Isihya usa Kiraisihopi kiyaami giwunyaahohitihanda Autaahaatihni kiyaisi, ‘Sahi titihyaati saasanotahiyaate,’ undisawihiya nga nasisoaari bimitaapo,”

Abakukiho 2:4

tati jipatipindise.

Isihya Nahatiya Maipihandi Kaiwi Autaahaatihoihsai Ahosumwawaayopo

¹⁸Iyataati ami Autaahaatihoihsai isihya nahatiya ahosumwapi maipihandi kiyohitihandapi apipaahi Koaisi apowindihandi Autaahaatihni yamahipataatihapi ausaimanataise, ami kiyaami maipihaiwa kiyohiwaiwaara Autaahaatihomi piwiha akitiha akaaha

nahataisi nepi ipihatisohitihandapi wihoaanjhandi maipihandi kiyai numwitando. ¹⁹Autahaatiho kiyaisi wihoaanjhandi maipihandi numwindindi apaapimahe, kiya kopi mmowi gwinyaitaatiwihaiwa aimi auta ausaimaninataise ami Autahaatiho sawaho aimi neti nunjiho. ²⁰Iyati wuwani yeyetati Autahaatiho yamihapatuni yapipatuni ami kahapaamapipauni kiyati ahaisururaapi wapa auta namoipati noasandiwaiwa komi watipihandi watipihaiwa kiyati kandinihi jinjahira ahotindihandi ami Autahaatiho nehi sawahometirihiretapi isihiya aimi auta mmonimi nasawaatawaayopo. Kahapaamapipa Autahaatiho kiyati ahaihi auta ahotiwaiwetapi wapa noasandimbipaapi isihiya aimi mmoniwihiyaare. Isi kiya Autahaatihoai windi samunditaapo kinyapi Autahaatiho so bindataise taati nyahi apipaahi windi moho munditaapo. Apipaahi owetitaise. Isi kiya windi samunditaapo. Autahaatihopi ko nyami maipihaiwa mose taati kiyahaayo munditaapo.

²¹Autahaatiho bimindihandapi kiya aimi mmonawaahandi kandi ko Autahaatiho apipaahi akitihoso tiwi windi gimaawunyaahopo. Aiwi ami kiya koaisi windi saundiwi, “Kahapaamapipa nahatewa kinyihi kiyapaise,” undiwi gaare mundopo. Owetise. Kiya windi samaiwi daahi kiyaami amitiha omanjitihi nipitati apipaahi asihatamataise. ²²Kiya satiwi, “Nyahi amitiha gaaha gwinyaitihaahandi nesi kaitihaahira mmonaahiyaanine,” tawaahandi kandi daahi kiya noaipapi apipaahi isihiya naharihatimaare. ²³Aiwi Autahaatiho jinjapihi asoho konihi bimisihopi windi baiwi giwunyaapi gaapundiwi mepi autaahepumwamaahopo. Kopi nanipimapi nehi siwipati isihiya napopi owetohiyihyaamuni kohasipihomuni akwiranihomuni nepi oturiwi kaiwi kaiwaapi giwunyaapi atotipiwesawi gaapundiwi mepi autaahepumwawaayopo.

²⁴Kiya siyauhi namati Autahaatiho kiyaisi neti kiyaami omanjitihi maipihaiwa apipaahi ainjotahaiwa gwinyaahohiwaiwa kaitaatiwihatihemataise. Aihhi kiya kiyaami ambipati maariho katihi nesi nandaapi apipaahi ainjotati maipihapa usihiya sawana ami asihiya sawana kiyaami ambipati nepi mimaipaiwihaiwa ahoyaniwi kaiwi naminiwi kainawaayopo. ²⁵Autahaatihomi piwiha akaaha namapi nanipimapi jaipipa nepi maapi ko kiyati ahaiwaiwai Autahaatihoemapi kaiwaapi atotipiwesawi gaapundiwi mepi autaahepapi kaiwaami asimwaatitihhi pinowaayopo. Autahaatiho kahapaamapipa ami isihiyai kiyati ahaisihoai kiya ko kiyati ahiwisawihiya windi atotipiwesawi gaapundiwi mepi autaahepumwamahopo, kiya koaisinihi nasisoari akitinihi mepi Autaahepumwaitaatiwihoaiso.

²⁶Sandi siyauhi kandapi Autahaatiho isihiyaisi sawanaami ambipati maariho namasaatati ainjotati maipihaiwaatihemataise. Ami asihiya sandi usihiyaisawi titihhi namaatiwi kainiwi bitoaitaatiwihireti namasi asihiya sawana asiri kihireti kiyaami ambipati sawana isiniwi naminiwi

kainawaayopo. ²⁷Ami siri kireti usihiyaisangi asihiyaisawi namaatiwi ambipati timaamaipi kainiwi bitoaitaatiwihireti namasi asiri kihireti nehi usihya sawanaapaahihi kiyaami maariho windotaise. Aiw i usihya sawana kiyaami ambipati isiniwi naminiwi apipaahi ainjotati maipihaiwa kainawaayopo. Saiwi kainawaawi kandaahi titihi naitaatiwi kiyohitihandi kandapi wihoanjihandi maipihandi newaayopo.

²⁸Ami kiya saiwi kiyauhi Autaahaatiho nehi iwinjasih i kiya kiya maipihaiwa amitiha maarihoatihi gwinyaahohiwaiwa wapa akipipa gaahapa owehaiwa kiyawaayopo. Ami sandi kiya Autaahaatihopi piwiha akiti katirihireti gwinyaitaatiwihandapi sandi wapa awaindihandimaahe tiwi gwinyaahotihanda ko kiya nehi iwinjataise. ²⁹Kiya kahapaamapipa apipaahi windi titihimetihandi ami maipihaiwa ami kahapaamapipa nehi sawanaapihapaapaahunyaahohitihandi ami isihya usaisi nepi nusopisasitaatiwi nasisoari maariwi gwinyaahohitihandi kiyaami ambipati maariho amitiheti kipwindahiyaare. Ami manditipipa ami isihya siyihyaisi tipi nemaitaatiwihandi ami tundaatiwihandi ami jinjaipitindaatiwihandi ami isihya usai maiphapa wihoanji kawitaatiwihandi kiyaami amitihetuni ambipati maarihoatihi tisaindahiyaare. Iyati piwiha usaamiha natipi nepi isihyaami dawaataatapi katiwi kaniwihyaare. ³⁰Aiw i isihyaami ambipati ami ambipati ami dahopa nepi nusopisasitaatiwi maipihaiwa katiwi kaniwihyaare. Kiya Autaahaatihopi apousati pohipaiwi isihya usai wipiwimatitaiso maatiwi maipihaiwa pihitiwi katiwi kaiwi genaniwi kiyaami ambipati nepi awaindemapihiyaare. Aiw i daihira maipihaiwa kaitaatiwihira taahirihiraapi daapi nepi ami kiyaami saniya sapiyai atihomaawiwi wiretundiwihiyaare. ³¹Aiw i titihapa ami titihimetihapa kiya mmondaatiwihandi amitiha owetati nahiriwi ami wapa kaitaatiwi piwiha timaniwi katohipipa windi kamaiwihyaare. Aiw i ami isihya usaisi kiya windi gaahati kamaawiwi ami windi maariho nunyaw i asipimaawiwihiyaare. ³²Autahaatihomi winihapipa satati isihya saiwi sireti kiyohiyihya Autaahaatiho kiyaisi nemahonihi napwitaapo tati ahotimbipa mmoniwihiyaare. Mmoniwihiyaataawaahandi kandi mwitetiwi kiya kahapaamapipa maipihaiwa kiyawaayopo. Aiw i ami nehi sandihih i kiyawaamaayopo. Isihya usa saiwa maipiwa kiyohiyihyaisi gaasi kaiwise undawaatopo.

Autahaatiho Isihyai Neti Titih i Tipitapaati Usondaise

2 ¹Sahi isihyaati nahatiyaati isihya usaisi piwiha nepi yawutaapi tipitapaapi usohohiyihyaate, naasonji naasongisi nini piwiha kahititandiyoni baimbi atime, titihimetati maipihaiwa kinyi satipi, saiwa nini windi kamaindihonine tipi, kinyi windi nepi namoaasitaise, kihomihonye. Kinyi baimbi atime, isihya usaisi kiyaami titihimetati

maipihaiwaapi piwiha nepi kiyaisi yawutaapaise. Siyapaapi siri kireti kinyi kiwahongisangi maipihaiwa kaimbihonjisi kinyi kiwahonyiheti piwiha nepi yahutaatapaise. ²Ami nyahi aimi mmonaahiyaane, isihiya setahaiwa titihimetahaiwa kiyohiyihiyai Autaahaatiho maipihaiwa wihoanji nunyati titihi tipitapaati usosiho. ³Ami kinyi utaahonji kiwahonji maipihaiwa sikaiwa kiyapaahandi kandi usa kaiwa kiyohiyihiyaisi nepi tipitapaapi usohingonye, kinyi napitaimbunyaapaise? Kinyi Autaahaatiho ningisi windi neti tipitapaati maanondaiso tipunyaapaino? ⁴E kinyi Autaahaatiho gaahandi awaindihandi nahinyati windi keti gisi nemaahimati konihi nehi ginjatimi naindihandi nehihande tipi nepi pohipaimbimaino? Autaahaatiho sandi gaahandi gisi kahimi naindindi kinyi kinyi maipihaiwaatihapi japihi nepemaititaapi kahisataise. Isi kinyi sandi mmonapaino, e owetiso? ⁵Kinyi kinyi omanjititihii maarihoatihi daahi nepi watipitahone. Siyapaapi kinyi wihoanjihandi naitaapihandi taapi nepi ahoyapaise. Isi sihi ipoti asisiha Autaahaatiho isihyaami maipihaiwaapi komi apowindihanduni ami titihi isihyaaisi tipitapaati usondandihandi neti ausaimanihonihura kinyi wihoanjihandi kandapi naitaise. Saimbi naitaapihandi kinyi wani taapi nepi awaindemapaise. ⁶Ami sura Autaahaatiho isihya nahatiya naaso naasoaisi kiya kiyohiwaiwaapi titihi kireti wihoanjihandi gaahandisangi ami maipihandi isihiyai yaawihandisangi numwitaise. ⁷Iyati ami isihya usa nehi gaahandihii kiyaanihi mwitetiwi kaiwi ami yamihapataatihi kiya Autaahaatihoaisawi bimitaatiwihandapi daapi ami kiyaami ambipati nga isihyaamuni Autaahaatihomi ndiheti noaipaitandihandapi daapi ami windi napopi owemetiwi asiyihya kiyaanihi bimitaatiwihandapi daahohiyihiyai jinjahira nasisoari bimitaatiwihandi Autaahaatiho kiyaisi numwitaise. ⁸Iyati ami isihya usa nehi sawanaapaahunyaapihiyaare. Aiwi Autaahaatihomi piwiha akaahaapi pohipaiwi nemapihiyaare. Aiwi ami titihimetimbipa kaitaatiwi titihitimbipai pohipaiwi namapihiyaare. Isi siyohiyihiyai Autaahaatiho koai apowindihandaahi wihoanjihandi yaawihandi kandapi numwitaise. ⁹Iyati ami isihya nahatiya maipihandi kiyohiyihya naanjihandi kiyaami ambipati maariho apipaahi awaindihandi yaawahandi naitaapo. Autaahaatiho kiyaisi nunyonihii namasawi jiji Judaahiya nesaihi ami isihya nahatiya Judaahiyaami dawaataatihiyaisangi naitaapo. ¹⁰Iyati ami isihya nehi titihi gaahandihii kiyohiyihiyai yamihapataatihi baiwi bimitaatiwihanduni ami kiyaami ambipati Autaahaatihomuni isihyaamuni ndiheti nga titihi autaahi ahotitandihanduni maariho omanjititihii napaisaatitandihanduni Autaahaatiho kiyaisi numwitaise. Namasati jiji Judaahiyaisi nunyati ami kiyaami dawaataatihiyaisuni saiwa Autaahaatiho numwitaise. ¹¹Ami Autaahaatiho usaisi windi mmonati neusosahomahe. Owetise. Isihya nahatiyaisi nehi naasaipiti

kati osamati kawisahore. Isi ami siri kireti ko isihya nahatiyaisi neti tipitapaati usondaise.

¹²Autahaatiho Mosesihoai winihapipa Judaahiyaapi numwimbipaami ipaahaapi dawaataati bindawaawi maipihandi kiyohiyihiyai kapaami ipaahaapi Autahaatiho neti tipitapaati usohonihiki kiya owetitaapo. Iyati isihya Autahaatiho Mosesihoai winihapipa numwimbipaatihi bindawaawi windi minjapepihiriwi maipihandi kiyohiyihiyai winihapipa kapaami piwihaaraahi Autahaatiho neti tipitapaati usondaise. ¹³Iyataati ami isihya winihapipa nehi atihira atisohiyihiya Autahaatihomi ndiheti noaipapi titihi saasanotahiyaamendaise. Owendaise. Isihya winihapipa baiwi atiwi ami kapa katirihireti japepihiriwi isiwatohiyihiya Autahaatihomi ndiheti noaipapi titihi saasanotahiyaaimatawaayopo. ¹⁴Judaahiyaanami isihya dawaataatihiya nyapi winihapipa Mosesihoai Autahaatiho numwimbipaapi windi atihomiwi ami moniwihyaare. Saiwihyaatawaahandi kandi nehi kiya gwinyaahohitihandaahi Autahaatihomi winihapipa katirihireti wiwara kiyawaayopo. Kiya Mosesihomi winihapipa owetati windi moniwihyaandaahandi kandi ami winihapipa kiya katirihireti nehi nanihaiwi gwinyaapi japepihirawaayopo. ¹⁵Iyataati kiya kaiwi daiwi bitohohitihandi neti siyati nasooanataise, isihya wapa kaiwi japepihiritaatiwi winihapipa katiwaiwa kiyaami omanjititihiki jipatipindataise tati neti nasooanataise. Iyati ami kiyaami amitiha maarihoaisangi sandi akite tati neti nasooanataise. Ami kiyaami omanjititihiki gwinyaahohiwaiwa wiweti kiyaisi saundati, “Sahi piwiha naitaatiwihandi ahotahiyaate,” undati ami wiweti kiyai saundati, “Sahi ainahiyihyaatisi piwiha wa windi namaitaapo,” undataase. ¹⁶Aihi sandi siya kiyati noaipaitaihi nini Jisaasiho katati kaiwaiwaapi piwiha gaaha waniha neti ausaati isihiyai kaundataato. Iyataati sandaato, nini piwiha gaaha waniha ausaahohiha katirihiri siri kireti noaipataise, ndi kandaato. Aindi sandaato, asisiha ipotiheti Kiraisi Jisaasihomihetapi Autahaatiho kahapaamapipa isihya omanjititihiki noasawi gwinyaapi kiyohiwaiwa neti ausaimanati tipitapaati mmonati wihoaanjihandi numwitaise, ndi kandaato.

Judaahiya Satiwi Nyahi Autahaatihomi Winihapipa Mmonaahiyaane Tiwi Gwinyaawaayopo

¹⁷Ami sahi isihyaati Judaahiyaatihi satiwi, “winihapipa nyangi nyatatamanitaiso,” tiwi kapa baiwi isipi kapeti wirandawaayopo. Aiwi ami sahi satawaatopo, “nyahi Autahaatihomi isihyaanine. Iyaati nyahi komihini deti bindihaayo,” tawaatopo. ¹⁸Aiwi ami sahi wapa kaitaatiwihaiwa Autahaatiho neti gisunyaasiwaiwaapi mmoniwi ami titihi nga saasanotihapa sahi kaitaatiwihapa winihapipaatihapiki aimi sahi mmoniwi nepihyaate. ¹⁹Aiwi ami sahi aimi saiwi mmotinawaayopo:

“Nyahi isihya ndiha niyotahiyai daihira nunjitihaahiyaane, tiwi ami isihya asahatinditihimohiyihiyai sisiha tipowaati autaahiwiwa niwimaitihaahiyaane,” tiwihyaate. ²⁰Iyati ami sahi satiwi, “Nyahi isihya Autaahaatihomihaiwaapi nahiriwi moniwihiyaisi kaiwa nunjaati katawaunjaati ami manyinya waimwaayai katawaunjohiyihyaane,” tawaatopo. Aiwi winihapipaatihi gwinyaitaatiwihandi tisaitati ahotindihanduni Autaahaatiho akitihopi piwiha akaahauni mmoniwihyaate. ²¹Aiwi ami isihya usaisi ikomaaniwise undiwi sahi katiwunjawihyaate. Isi napindapi sahi sawanaati windi katiwimaasanihopo? Sahi piwiha satiwi, “Windi ikomaanime,” tiwi ausaapi katawaahandi kandi sahi ikonawaayopo. ²²Aiwi sahi satiwi, “Asihya ami usihya usaamihiyaisapi ikonipi kamaime,” tawaahandi kandi sahi sawanaati sandi kandi maipindi kiyawaayopo. Aiwi wapa isihya oturiwi namasawi siwipati kiyauhihaiwaapi sahi pohipaiwi kahitiwi noamawaahandi kandi kaiwaami anihaiwaatihi nandaapi katih wapa ahotihihaiwa sahi ikonipi nepihyaate. ²³Aiwi ami sahi satiwi, “Autaahaatihomi winihapipa apipaahi gaahapaatihi mmonaati newaahiyaane,” tiwi katiwi genanawaahandi kandi sahi komi winihapipa nepi sehimwaapi nusopisasohitihandaahi Autaahaatihomi ambipati nepi apipaahi mimaipaiwi koai mawihandi nunyawipi nepi nusopisasawaayopo. ²⁴Ami sandapi Autaahaatihomi piwiha jipati pindisiha wa satise:

“Sahi Judaahiyaati daiwi bitohohiwaiwaapi isihya sami dawaataati bimohiyihya Autaahaatihopi sisipihitopo,” *Aisaiyaaho 52:5*
tati jipati pindise.

²⁵Sahi Autaahaatihomi winihapipa baiwi japepahirawaawaahihi sami ambipati namandipapi ahoaandindihandi sandi jatatanaitaise. O ami Autaahaatihomi winihapipa sahi windi baiwi minjapepahirawaahandi kandi sami ambipati namandipapi ahoaandindihandi sangi windi maasitatanaitaise. ²⁶Iyataati ami Judaahiyaatami dawaataati isihya bimohiyihya Autaahaatihomi winihapipa baiwi japepahiraisaihaahi Autaahaatiho satati, “Kiya ambipati namandipapi ahoaandahiyaare,” tati windi kiyai mausondaiso? Ami kiya kiyaami ambipati windi namandipapi ahimoaawaahandi winihapipa japepahiraisaihaahi ami kiyai ambipati namandipandahiyaamatiyati siri kireti Autaahaatiho usondaise. ²⁷Sahi Judaahiyaati Autaahaatihomi winihapipa utipihoaatihi nepi jipati paiwi samihatihi ahotati ami sami ambipati namandipapi ahoaandahiyaatitawaahandi winihapipa nepi nopisasawaayopo. Sahi siyauhihandi kandi isihya sami dawaataatihiya ambipati nahomaamandipapihiya winihapipa nehi nanihaiwi baiwi nepi japepahirawaayopo. Isi sandapi kiya samiheti piwiha nepi yasutaitaapo.

²⁸Iyataati ami isihya diyaanihi titih Judaahiya akitinihi ambipati namandipandati ahoaandahiyaare? Isihya nehi kiyaami

ambipateti nehi yamaati tiwatihaati namandipanda ahoaandisawihya siya Judaahiyaamaahe. Owetise. ²⁹Isihiya titihi akitinihi Judaahiyaatohiyihya kiyaami maariho omanjititihoma Autaahaatihomi Itipihora noaipapi namandipandati ahoaandahiyaare. Winihapipaara yamaati tiwatihaatihya ambipateti namandipanda kiyaami omanjititihya maarihoatihya namandipanda ahoaandisawihya siyaahihya Autaahaatihyaapihya ambipati awaipati newaayopo.

3 ¹Iyataati ami isihyaati usaati satiwi nasendaapo, o ami siyonaahi Judaahiya isihya kiyaami dawaataati bimohiyihyaaisi napindaahi daahepumwapi nusatipihahopo? Titaapo. Satiwi ami kiya kiyaami ambipatami atitahi namandipapi kiyai gaahati kiyawaayowo? Tiwi nasendaapo. Aiwi ami satitaapo, ambipati namandipatotihandi nehi ambipatamihandimetanaahi ami kandami akitihandi gaahandi napindi noaipaitaisono? Titaapo. ²Ami sahi satitindapi nini wihoanjihandi satitandiyi, kiya wiwa taahiwaiwa taahiwaiwetapi isihya kiyaami dawaataatihyaaisi nusatipihawaayopo. Apipaahi awaindihandi Autaahaatihya komi piwiha Judaahiyaami ikwiraatihya ahiyataise. Aihya Judaahiya kopi jatawaawi isihya katiwunjawaayopo. ³Iyataati ami Judaahiyaami usa Autaahaatihya piwiha kiyai numwisihya windi baiwi gimaawunyaapi miwatisaihaahi napitimatitaise? Autaahaatihya isihyaaisi saiwa saiwa sawitando tati gwinyaati katati timaniwaiwa kiyaami siyohitihanda neti nopisasinihonihi ko windi neti itatamanati kaiwa nga kamaitaiso? ⁴Autaahaatihya windi siyati kamaitaise. Ami isihya nahatiya wiweti jaipitihandihandi kandi Autaahaatihohi nahateweti nehi akitihaiwaahihya katati kiyahore. Iyataati sandapi Autaahaatihomi piwiha jipitipindisihatihya wa satise:

“Autaahaatihonye, kinyi piwiha katisamihaapi isihya satiwi komi piwiha apipaahi titihi akite titaapo. Iyataati ami isihya gisi asireti jaipitiwi satiwi, ‘Kinyi sireti saiwa saiwa kaimbihone,’ tiwi piwiha kinyihetemasihya kaisi kinyi nepi tipindimapi titihi ainahihoni saasanotahoni noaipaitaise,” *Aunihihiri 51:4*

tati jipitipindise.

⁵Iyataati ami nyami maipihaiwa kiyohiwaiwa Autaahaatihomi titihi saasanotiwaiwa neti ausaimanati nasoanihonaahi nyahi napititihawa? Isihya usa katohipati newaati nyahi satitihawa? “Nyahi maipihaiwa kiyohiwaiwa neti isihyaaisi siyati, ‘Autaahaatihya nehi titihihosi ami titihi gaahaiwaahihya kiyataise,’ undati neti nunjonaahi ami Autaahaatihya titihimetahandi kiyati nyami maipihaiwaapi wihoanjihandi yaasihandi nyangi napindapi nanyinyataise?” titihawa. ⁶Apipaahi owetise. Ko windi titihimetihandi kiyahomahe. Isi ami Autaahaatihya apipaahi titihosi titihi kiyati nyahi Judaahiyaanangi nyami maipihaiwaapi neti windi tipitapaati maanyonataataahi ami isihya nahatiyaisi napindaahi

napitiyati neti tipitapaati usondaisono? ⁷Iyataati ami sami usaati satitaapo, “Nyahi Autaahaatihomi piwiha newa japepihiritaano taati katohirihireti windi kamaayohitihanda Autaahaatiho isihiyaisi saindi kawito tiwaiwa waati auta noaipati ko sawahoaisi neti niwimaati awaindemahonaahi ami Autaahaatiho napindapi nyangi satati sahi maipihyaate, nyatati piwiha nyamiheti neti yanyutaase?” titaapo.

⁸Ami sandi sahi satawaawaahi kimandi satiwi, “Gwinyaawaawe, nyahi maipihandi pihitaati kaitihaawo, kandetapi Autaahaatiho sawahoaisi neti awaindemwaitandihandi nga pihitati naito,” tiwi gwinyaawaawe. Sandi satiwi gwinyaawaawi nini satohitindapi isihiya usa nisi ambipati nepi nanopisasiwi nisapi piwiha katiwi, “Poriho isihiyaisi sandi kaitaatiwi kataunjataise,” tiwi asireti katawaatopo. Isi isihiya siya satiwi gwinyaapi kiyohiyihiyaisi Autaahaatiho titihi nga maipihandi wihoaanj numwitaise.

Isihiya Nahatiya Naasohi Naasohisangi Titihi Saasanotahiya Apipaahi Owetamase

⁹Ami sandi setisi nyahi Judaahiyaanini isihiya nyami dawaataati bimohiyihiyaisi Autaahaatihomi ndiheti nusatipihaawaati gaahiyaaninitindiho? Apipaahi owetise. Judaahiyaaninuni isihiya nyami dawaataatihyauni nauratihyaati nyami maipihandi kiyohitihandi noaipati nyami awaisihoematati nyainjatataise ndi aimi neti nasiso.

¹⁰Iyataati sandapi Autaahaatihomi piwiha jipatipindisiha wa satise:

“Isihiya nahatiya naasohi naasohisangi Autaahaatihomi ndiheti titihi saasanotahiya apipaahi owetamase.

11 Iyati ami titihape titihimetihape tiwi mmoniwihiya apipaahi owetati ami Autaahaatihopaahaiwihiya apipaahi owetamase.

12 Iyati ami isihiya nahatiya Autaahaatihoai windi nepi miwatiwi namapi ami nahatiya noaipapi wapa maipitih daatipatipati namahohipipaamatawi apipaahi maipitiwimawaayopo.

Aiwi naasohi naasohisangi gaahandi apipaahi windi kamaiwimawaayopo?” *Aunihihiri 14:1-3*

13 “Aiwi kiyaami maahomwaanj itapipaami animwaahipati nundataati ainjotimumwaanjamatayahamwaanje.

Aiwi kiyaami maahomwaanj kamwaanj omasihetapi maipihapa jinjaipipa nipinjanimi noaipahiyaare.” *Aunihihiri 5:9*

“Kiyaami maahomwaanjapi piwiha maipihaha noaipasihaara akwiranihomi onaapipaamatiyati isihiyai tiwamasih napowaayopo.” *Aunihihiri 140:3*

14 “Aiwi kiya kiyaami maahomwaanj isihiyaami maariho nepi tipatetepumapi mimaipiwitaatiwihaiwaahihi tsaitahiyaare.”

Aunihihiri 10:7

15 “Aiwi ami kiya keti tariwaiwi isihiyaisi yaawihaiwa nunyaw siyihiyaisi tipihyaare.

16 Aiwi ami kiya isihiyaisi nepi nopisasimi niyauhihapihahi ami isihiya nepi iwiriniwi nopisasinimi nowaayopo.

17 Aiwi kiya isihiya usaisawi bipi piwanniwi napaisaati bimitaatiwihira daihira windi moniwihiyaare.”

Aisaiyaaho 59:7-8

18 “Aiwi kiya satiwi nyami maipihaiwaapi Autaahaatiho yaasati naanhandi nyangi nanyamitaiso tiwi windi apipaahi yamaiwihiyaare,”

Aunihihiri 36:1

tati Autaahaatihomi winihapipaatihi jipatipindise.

19 Iyataati nyahi aimi mmonaahiyaanine, piwiha nahataapa Autaahaatiho winihapipa katimbipa isihiya kapaami naaporihiroti bimohiyihyaapise. Autaahaatiho winihapipa ahiyataise. Kapetapi isihiya yapihahi nahatewaraahiyaisi sahi maipihyaate, undati nunjati kiyaami maahomwaanji neti nuwisapuwitando. Iyati isihiya nahatiyaisi Autaahaatiho sahi maipihyaate, undati neti tipitapaati usondando. 20 Sandi apaapimaase, isihiya winihapipaami katiwaiwa japepihiriwi kiyohitihandaahi Autaahaatihomi ndiheti noaipapi titihi saasanotahiyaataawaamaayopo. Apipaahi owetise tatise. Iyati ami winihapipaami otipipati kairihiri sirete: isihiyaisi, “Sahi maipihyaatisi maipihaiwa kiyawaayopo,” undati neti nunjataise.

Isihiya Kiraisihopi Giwunyaahohiyihiyai Autaahaatiho Sahi Titihi Saasanotahiyaate Undati Usonataise

21 Isihyaami winihapipaami daihira setihihandi kandi Autaahaatiho isihiyai sahi nisi ndiheti titihi saasanotahiyaate, undati usondandihira wira wani neti isihiyaisi nunjataise. Iyataati sira daahira winihapipaamihiraamaahe. Owetise. Siyataahandi kandi sikandapi Mosesihomi winihapipauni ami Autaahaatihomi piwiha atiwi nepi ausaahohiyihyaami piwiha jipatipindisihaatihapi sandapi aimi ausaatati ahotise. 22 Isihiya Jisasi Kiraisihopi giwunyaahohiyihiyai Autaahaatiho saundataase, “Sahi nisi ndiheti titihi saasanotahiyaate,” undati usonataise. Sandi isihiya nahatiya Kiraisihopi giwunyaahohiyihiyai Autaahaatiho kawisataise, ami kiya nahatiya komi ndiheti nauratihetahiyaatiho. 23 Sandi isihiya nahatiya nauratetohitindi ami maipihandi kaiwi kiyai Autaahaatiho japihi numwaahonihi koaisawi maasi bimitaatiwihandapi nenoahitauhe. 24 Kiraisi Jisaasiho isihiyai kiyaami maipihandaatihapi japihi nuwati numwaitandi otipipati ipi titihi atawihateti kaindahandapi komihetapi Autaahaatiho isihiya wihoanjihapa windi kamaiwihandi konihi nasisoaari maariho asipaindihandaahi isihiyaisi saundataase, “Sahi nisi ndiheti apipaahi ainahiyihyaati titihi saasanotahiyaate,” undati usonataise. 25-26 Autaahaatiho Jisaasihoai ipi titihi atawihateti natausaasihi ko

kateti napotaise, isihya kopi giwunyaahohiyihyai maipihandaatihapi japihi numwaitando. Iyataati jihura isihya maipihandi kiyohiyihyai sahi wihooanjihandi nepise, undati nemaamati nehi nanihyati bipi iwinjainjahore. Jihura sainjahondaahandi kandi ami ko titihotindihandi wani kimura isihyaami maipihandi titihemwataayo tati Autaahaatiho isihya nahatyaaisi nunjati ausaimanataise. Ami siyati isihya nahatiya Kiraisihopi giwunyaahohiyihyai saundati, “Sahi nisi ndiheti titihi saasantahyaate,” undohihonine tati isihyaaisi neti nunjataise.

²⁷Isi nyahi winihapipa japepihironihi Autaahaatiho kandaahi nisi ndiheti saasantahyaate nyatiji nyahi kandapi tahaapaitihaawo? Apipaahi owetise. Ami sandi nyahi tahaapititahaahandi napindape? Owetise. Sandi nyahi winihapipa japepihirihaawo e? Apipaahi owetise. Nyahi winihapipa japepihirihaawi tahaapititahaahandi owetamase. Nehi nyahi Kiraisihopi giwunyaahohitihanda nyahi genanaati tahaapititahaahandi owendaise. ²⁸Iyataati nyahi siyaati mmonahaayo, isihya winihapipa japepihohitihanda kiyai Autaahaatiho sahi titihi nisi ndiheti saasantahyaate undataamaase. Owetise. Nehi kiya Kiraisihopi giwunyaahohitihandaahihii Autaahaatiho kiyai saundataase, “Sahi nisi ndiheti titihi saasantahyaate,” undataase. ²⁹Isi ami Autaahaatiho nehi Judaahiyaanamaahihii Autaahaatihoro? E ami isihya nyahi Judaahiyaanami dawaataatihyaamimaawi Autaahaatihometindiho? Ye, Autaahaatiho nehi naasihisi Judaahiyaanamuni isihya nyami dawaataatihyaamuni ko Autaahaatihore. ³⁰Autaahaatiho nehi naasihisi kimiko nyahi ambipatami atitati namandipata Judaahiyaanangi nyahi nyami Kiraisihopi giwunyaahotihanda Autaahaatiho sanyatataase, “Sahi nisi ndiheti saasantahyaate,” nyatataase. Iyati isihya nyami dawaataatihya kiyaami ambipati nahomamaandipapihiyai kiyaami Kiraisihopi giwunyaahotihanda Autaahaatiho saundataase, “Nisi ndiheti sahi titihi saasantahyaate,” undataase. ³¹Isi ami siyonaahi nyahi Jisaasiho japihi nanyamaasihopi giwunyaahohitihanda Autaahaatihomi piwiha winihapipa jihura jipatipindimbipa apipaahi namihaayono? Owetise. Nyahi windi samaayaati kapai newa anditiwaati titihiwaati isiwataati kapaami katirihireti daayahaayo. Sandi kireti kiyahaayo ndi nasisitandi piwiha jipatipindise ndi satohimaapi kimandi kasatitaani atiwise.

Autaahaatiho Abiraahamihoi Saundati Kinyi Nisi Ndiheti Titihi Saasantahoge Undataase

4 ¹Abiraahamihoi Judaahiyaanami asihoi koetapi nyahi namoyaatimi nasotihoi Autaahaatiho wapa kawindihandapi nyahi mmonaati gwinyaitihaawi katitandiyo. Abiraahamo so nehi utaaho nyamatyahosi ko napitaihi ami Autaahaatiho koai napitwisataise? ²Ami Abiraahamo

nehi sawahomi kaiwaiwaara Autaahaatiho nisi ndiheti titihi kinyi saasanotahonje undonaahi ko nini watipihonine tati genanati tihaapititaihe. Ami ko siyati tihaapindaataahi nehihandi kaitaihe. ³Ami sandapi Autaahaatihomi piwiha jipatipindisiha wa satise:

“Abiraahamiho Autaahaatihopi giwunyaasihi ami sandi
giwunyaasitindaahi Autaahaatiho Abiraahamihoai kinyi nisi
ndiheti titihi saasanotahonje,”

Wuwanihapithi 15:6

undati usonataise.

⁴Nyahi aimi mmonaahiyaane, utaaho wo wapa otipipati kaisiho wapa nawihoaisangi netaise. Komi otipipati kaipatapi wihooanjhapa nesipipaapi nehihandi netaise tiwi isihiya usonawaamaayopo. Owetise. Komi otipipati kaipatetapi nusoaipasihapa netaise, tiwi usonawaapo.

⁵Utaaho otipipati kiyahomihireti sendaahandi kandi utaaho wo otipipati wapa kamaayati nehi Autaahaatiho isihiya maipihiyaisi sawaho gwinyaasirihireti sahi titihi saasanotahiyaate, undirihireti kaundisihopi giwunyaaso komi giwunyaasitindaahi koaisi Autaahaatiho kinyi titihi saasanotahonje undataase. ⁶Ami sandapi Daawitihoisangi satati katise, utaaho wo otipipati katetapi koai Autaahaatiho kinyi titihi saasanotahonje unditandihati windi kamaayahoi nehihandi Autaahaatiho komi maaritindhandaahi kinyi titihi saasanotahonje undoniho nga maarititaise tise. Iyati Daawitihoi satise.

⁷“Isihiya titihimetihaiwa kiyohiwaiwa Autaahaatiho aimi nemwati, kiyaami maipihaiwa nahwisati nanipimatisawihiya gaasi maaritiwise.

⁸ Iyataati ami utaaho wo komi maipihaiwa neti komiheti yawutaati nemaitandi Awaisiho maipihaiwa neti windi awitati amitiheti ahimaayoniho

gaasi maaritane,”

Aunihihiri 32:1-2

tati Daawitihoi katise.

⁹Isihiya kiyaami maipihaiwa Autaahaatiho nemwati sahi titihi saasanotahiyaate undisawihiya maaritiwise, tati Daawitihoi katindindi Judaahiyaanini ambipatami atitati namandipandahiyaanapaahiso e owetiso? Owetise. Isihiya nyahi Judaahiyaanami dawaataati ambipatami atitati nahomaamandipatiwihiyaapimaawise. Iyataati Autaahaatihomi piwiha wa jipatipindisiha nini katonihini nyahi aimi mmoho satahaaro Abiraahamiho Autaahaatihopi giwunyaasihi kandaahi Autaahaatiho Abiraahamihoai kinyi nisi ndiheti maipihandi owehoni titihi saasanotahonje undise tahaaro. ¹⁰Sandi Autaahaatiho Abiraahamihoai saasanotahonje undindindi Abiraahamiho komi ambipati namandipasihura ipoti kaundataamaase. Jihini sangi namandipasihura sandi kaundataase. ¹¹Iyati jihini Autaahaatiho Abiraahamihoai saunda nisapi kinyi ginunyaahingitihanda nisi ndiheti titihi saasanotahonje

undati ami saundataase, sandapi akite tipi gwinyaitaapi kinyi kinyi ambipatami atitati namandipate undati ipoti kaundihi Abiraahamiho kireti kiyataise. Abiraahamiho siyati ambipatami atitati sangi ahoati namandipati nehi jiji Autaahaatihopi giwunyaasitihanda Autaahaatiho koai kinyi titihi saasanotahone undindihanda isihya ambipatami atitati nahomaamandipatiwi ipotihura kopi giwunyaasaihihiyai siri kireti Autaahaatiho saunda sahi saasanotahiyaate unditandihyaami ko noipati sapiho satihomatataise. ¹²Iyati Abiraahamiho Judaahiyaanini ambipatami atitati namandipata ahoandahiyaanami apiho asihore. Iyati ami nyahi ambipati namandipatotihanduni ami ko ambipati namandipatindihandaahi noipati nyami apiho asihomatataamaise. Owetise. Nehi ko Autaahaatihopi giwunyaati daayati bitosirihireti nyahi komi dahopa itipati iwinjitihaahandaahihi ko noipati nyami apiho asihomatataise.

**Autaahaatiho Abiraahamihoai Kahapaamapipa
Numwitandi Jiji Timanati Kaundiwaiwa Isihya
Autaahaatihopi Giwunyaahohiyihyaapihaiwaare**

¹³Autaahaatiho Abiraahamihoaisuni komi mwaaya maatiya saisatoyai yapipati nahandi numwitandi jiji timanati kaundataase. Sandi Abiraahamiho winihapipa neti japepihirihi kandaahi kaundataamaase. Owetise. Nehi Abiraahamiho Autaahaatihopi giwunyaasilihi ami Autaahaatiho koai kinyi titihi saasanotahone undindihandaahunje. ¹⁴Isi ami Autaahaatiho Abiraahamihoaisuni komi mwaaya maatiya saisatoyai kahapaamapipa numwitandi jiji timanati kaundimbipa neti isihya winihapipa japepihrohiihiyai nunyonaahi napitimatitaise? Ami kimandi saimatitaise, isihya Autaahaatihopi windi gimaawunyaapi nehi winihapipaahihi japepihirisaihaahi napitimatitaise? Iyataati jiji timanati katiwaiwa akipipa windi namwaipaitaise. ¹⁵Ami winihapipaahi nyahi isihyaani maipihaiwa kiyohiwaiwaapi Autaahaatihoai apousonihi wihoaani maipihandi nyangi nanyamitandihandihiihi neti nyamihetemataise. Iyataati ami winihapipa wapa ahimotanaahi ami isihya kapa nepi windi sehimwaapi namopisasiwi maipihandi windi mondaapo. Sandi nyahi aimi mmonahiyaanine.

¹⁶Iyataati ami Autaahaatiho Abiraahamihoai jiji timanati wapa gi nahinyati kahito undati kaundindindi Abiraahamiho Autaahaatihopi giwunyaasitihandaahihi kaundataase. Ami sandi Autaahaatiho Abiraahamihoai saunda nini gi wapa nahinyati kahito undindindi Abiraahamiho wapa kamaayati owehandi apipaahi nehihandi Autaahaatiho sawahometirihiretapi Abiraahamihomi manyinya saisatoya ipoti ipotihura noaipasaihihiyai akiti kawitande. Iyati nehi Judaahiyaanini winihapipa japepihrohiihihiyaanangisaahi

kanyitandimaase. Owe. Isihiya nahatiya Abiraahamihomataiwi Autaahaatihopi giwunyaahohiyihiyai maawi kawitandi kandaase. Ami Abiraahamiho Autaahaatihopi giwunyaasitihanda isihyaanini ipoti ipotihura komatiyaati Autaahaatihopi giwunyaitihaahiyaanami apihoematataiso. ¹⁷Ami sandapi Autaahaatiho komi piwiha jipatipindisihaatihapi Abiraahamihopi satise:

“Nini gisi neti isihiya taahiyihiya yapipati nahandaahiyaami
sapihonihihmati ahingisataayo,” *Wuwanihapihi 17:5*

tati katisiha jipatipindise. Isi ami sandi Abiraahamihoai Autaahaatiho mwaaya maatiya saisatoya yapipati nahanda gaamati numwitandi Abiraahamihouni apwaataatuni aimi aungwoyi aungwaamiyaatihi jihi timanati katindimandi Autaahaatiho katirihireti titihi kaitaihi kandapi Autaahaatihomi piwiha nga noaipati aimi akaahaimatataise. Iyati ami Abiraahamiho Autaahaatiho kimikopi giwunyaaso so ko isihiya aimi napwauhihiyai japihi gaatati ahowimati numwaati ami kahapaamapipa wapa auta ahimotihi isihiya ndihaara windi monihauhahaiwaapi aimi kaiwa auta isihyaami ndiheti ahotihandamatiyati noaipati auta ahotane tihai kaiwa komi piwiha atisati titihi kireti noaipati auta isihyaami ndiheti ahotahore.

¹⁸Iyataati Abiraahamiho waimwaaahomendaati manyinya saisatoya namoyaitandi gwinyaitandihandi owetihihandi kandi Autaahaatiho watipihopi siyamopi giwunyaati jatimi notaati kandaahi noaipati ko isihiya taahiyihiyaami sapiho satihoematataise. Iyati Autaahaatihomi piwiha Abiraahamihoai kaundihi jipatipindisiha satirihireti kinyi kimwaaya kimaasihya gaasoya gaasisa taahiyihiya noaipaitaapo undirihireto. ¹⁹Iyati Abiraahamiho komi kinaukwiha pihitati 100 kaitandi aimi detitihai ko sandaase, “Nisi ambipati aimi nawainati awasihi ami nisi apopaati Saraahaatami maatitati aimi awipitati awasataise,” tati mmonataahandi kandi konihi andititati Autaahaatihopi giwunyaataise.

²⁰Siyati Abiraahamiho Autaahaatiho manyinya saisatoya taahiyihiya numwitandi timanati jihi kaundindihandapi windi samaatise, “Ese, Autaahaatiho ningi nanimitandi katiwaiwa kaitaindiho,” tati maariho yiyatiwi gimunyaase. Owetise. Nehi Autaahaatiho piwiha kaundisihopi andititati giwunyaasitihandetapi ko andititandihandi watipihandi neti ami ko Autaahaatihoai maaritati mepi autahemwataise.

²¹Abiraahamiho Autaahaatihoai mepi autahemwasitindi ko satate, “Autaahaatiho ningi manyinya taahiyihiya nanimitandi kandiwaiwa apipaahi akiti akitinihai kaitaiso,” tati komi maarihora mmonati gwinyaataate. ²²Ami sandapi Autaahaatiho Abiraahamihoai saundise, “Kinyi utaahoni titihi saasanotahone,” undati use. Sandi Abiraahamiho Autaahaatihopi watipitati giwunyaasitihandahe. ²³Iyataati ami sa piwa satati, “Kinyi titihi saasanotahone,” undati koaisi Autaahaatiho

uose tisa nehi Abiraahamiho sawahopaahihi katati jipatipindataamaise. Owetise. ²⁴Piwa sa nyahi ipoti ipotihura nyami Awaisiho Jisaasihoai animwaahipatombi ahowimati numwaasiho Autaahaatihopi giwunyaasahi kandaahi ko nyangi sanyatati sahi titihi saasanotahiyaate nyatitandihyaanapisangi maawi jipatipindataise. ²⁵Iyataati so Jisaasisoai Autaahaatiho ipi titihi atawihateti natausaasihi napotaise nyami maipihaiwa nenyamaitando. Iyati ami jahira animwaahipatombi asoheomati ahowimati numwaataise. Iyati sandaahi Autaahaatiho nyangi sanyatitando, “Sahi ningisawi titihi saasanotahiyaate,” nyatati nyasondando.

Nyahi Autaahaatihomi Ndiheti Noaipawaati Titihyaanitihaayo

5 ¹Ami sandi nyami Awaisiho Jisasi Kiraisihoetapi Autaahaatiho aimi nyangi sanyatati, “Sahi ningisawi aimi titihi saasanotahiyaatimatawaayopo,” nyatati nyasositindi sanyatataase, “Sahi ningisawi aimi nanihiyaati napaisaatimataati piwanaati sahuni ami ninuni naisihyaanimatihaayo,” nyatataase. ²Ami nyahi gaahapa wapa kamaayaahandi apipaahi nehihandi Autaahaatiho sawahometirihiretapi gaahaiwa kanyitandihandaatihi Jisaasiho nyangi nanyamaasi nandaasihi wani nyahi kandaatihi bindahaayo. Iyaati ami nyahi Autaahaatihoai kometirihireti usosaihi nausainjitihandi nanyinyonihiki koaisaati maasi bimitihaahandapi maaritaati sisahaunihiyahaayo. ³Iyaati ami nyahi naanjihaiwa nehohiwaiwaapisangi maaritaati sisahaunihiyahaayo. Sandi nyahi aimi mmonaahiyaane naanjihaiwa nehohiwaiwetapi nyahi andititi andititaati kiyaaninihi kaiwa nepi nutihaahati nehaayo. ⁴Iyaati ami nyahi andititaati maaritaati naanjihandi nepi niyohitihandaahi nyangi Autaahaatiho sanyatataase, “Sahi nga andititiwi naanjihaiwa nanihaiwi nepihiyaate,” nyatataase. Iyati ami ko nyangi sandi sanyatindimandaahi andititaati kometirihireti neti nanyisonihiki komi nausainjitihandaatihi Koaisaati maasi bimitihaahandapi jatitihahandi nyahi nehaayo. ⁵Iyataati Autaahaatihometirihiretimatitihahandapi nyahi jatohitindi neti nyami maarihoatihi satati, “Sahi nehihandi jatawaayopo,” tati pohipimaanyamase. Ami sandi apaapimaahae, Autaahaatiho komi Itipihoni nehihandi nanihiyati nanyamisihora nyami omanjititihiki waapohomatiyati nahato konihiki nuhaati wiwanyosihe.

⁶Iyataati ami nyahi nyami maipihandaatihapi newaati andititaati titihewaamatitihawihira owetihiki bimonihiki nyahi isihyaanini Autaahaatihoaisuni komihaiwaisuni ahosumwaati maipihyaanapi nyangi japihi nanyamaitandi Autaahaatiho asisiha titihi ahaisiheti Kiraisiho napotaise. ⁷Iyataati utaaho wo ainahihoni gaaho windi namwaapwitandi kopi wo aunahipati nanipimati neti napwitandihandi sandi apipaahi awaindihandi naanjihande. Isi ko namwaapwitandi isihiya nehi apipaahi

yahonyaahi kopi nanipimapi napwitaapo. Iyataahandi kandi ami utaaho wo apipaahi gaahopi nanipimati aunahipa neti napwitandiho wiwa wo bimitaise tati gwinyaatataise. ⁸Ami saimatihihandi kandi nyahi maipihandaatiji bimonihura kandaatihapi nyangi japihi nanyamaitandi Kiraisiho nyapi nanipimati napotaise. Aihi sandaahi Autaahaatiho maariho konihi nahato awaisiho nyangi nanyamindihandi neti nanyisataise.

⁹Aihi Jisaasiho nyapi jitipa nuhaati napwindihandaahi nyahi noaipawaati Autaahaatihoaisaati maawi titihi saasanotahiyaanimatahaayo. Aihi sandapi nyahi aimi akitetaati mmonahaayo. Aihi Jisaasiho Autaahaatihoai nyami maipihandapi apowindihandi nyamiheti piwiha neti yanyutaati sahi maipihyaate nyatati nenyamaitandihandaatihapi nyangi japihi nga apipaahi akitinihi nanyamaitaise. ¹⁰Nyahi Autaahaatihomi tiworisaanimataatatihiyaanini ihihandi kandi komi mwaaho nyapi napwindihanda japihi nanyamaasihi noaipawaati komi naisihiyaanimataati koaisaati piwannahaayo. Iyati wani nyahi Autaahaatihomi naisihiyaanimatahaayoni ami ko nga apipaahi akitinihi Kiraisiho asitimatitihaahandi nanyinyati nyami omanjititiji bimisihonetapi kiyaanangisinihi nanyamaitaise taati mmotinaati gwinyaahaayo. ¹¹Ami nehi sandihimaahe. Owetise. Nyami Awaisiho Jisasi Kiraisihomihetapi nanyamaasihi wani komi naisihiyaanimataati piwannahoiho Autaahaatihopi nyahi maaritaati sisahaunihiyahaayo ko nyami naisohoemainjiho.

**Nyahi Isihiyaanini Adaamihoetapi Napwitihahandi Newaati
Ami Kiraisihoetapi Asiyihiyaanimatitihaahandi Nehaayo**

¹²Iyataati utaaho nehi naasomi maipihandi isihiya nahatiyaisi nurimaasati yaurimwaati nusetaise. Utaaho nehi naasomi maipihandi kaindihandaaho. Ami sandaahi isihiya napwitaatiwihandi isihiya nahatiyai nurimwaataise ami isihiya nahatiya maipihandi kiyauho. ¹³Iyataati Autaahaatiho winihapipa sangi numwihi maipihandi jiji yapipataapihi ahondaise. Ami winihapipa sangi nunyataati Autaahaatiho isihiyaami maipihandi ninaasaindapi windi awitati mose. ¹⁴Iyataahandi kandi Adaamihoaapihapi namasati nasati Mosesihoapihi isihiya nahatiyai napwitaatiwihandi numwaati netaise. Isihiya usa Adaamiho maipihandi kaindihandi kandi windi kamaayauhahandi kandi kiyai neti uripatisataise. Iyataati Adaamiho utaaho wo ipoti napitandihomi siwipatamatiyahore. ¹⁵Ami Adaamihomi maipihandi Autaahaatiho nehi koaisunyaati isihiyaisi kiya wapa gaahapa kamaiwi nehahandi kawisati anditiwisitihandi naasaindindi kandimaahe. Owetise. Utaaho nehi naasomi maipihandi kaindihandapi isihiya taahiyihiya napowaayopo. Ami sandihi akite. Iyataahandi

kandi Autaahaatiho gaahandi nehihandi isihiyaisi kawindihandi maipihandapi isihiya napohitihandi nusatipihaati waati awaindahandi noaipataise. Utaaho nehi naasohi Jisasi Kiraisiho gaahandi nehihandi nanyamindahandi isihiyaanamiheti tisaahiwati napihi ami kandi nyangi Autaahaatiho nehihandi nawiho otipipati owehandi nanyinyati neti titihiyaanenyamataise. ¹⁶ Ami Autaahaatiho gaahandi nehihanduni ami utaaho nehi naasomi maipihanduni wapa naasaimbipa kapa nyamiheti noaipataamaise. Utaaho so Adaamihomi maipihandi nehi naasaindapi isihiyai Autaahaatiho neti piwihaapihemati kiya maipihandi nepi ami nepi nopisasiniwise ndaase. Ami Autaahaatihomi gaahandi nawiho otipipati owetati nehihandi siyate. Isihiya maipihandi pihitiwi taahitihandi kiyauhi ami Autaahaatiho kiyaisi pihitati waati asakiyati gaahandi nehihandi kawisataise. Iyati ko kiyaisi sahi maipihandapi piwiha owehiyaati titihyaate undataase. ¹⁷ Utaaho nehi naasohi maipihandi kaihi ami so utaaso naasomihandaahi napwitaatiwihandi noaipati kinjo awaisihomatiyati isihiyai neti uripatisati iwinjatataise. Iyataahandi kandi Autaahaatiho isihiyaisi nehihandi gaahandi kawindihandi, otipipati nawiho owehandi sandi napwitaatiwihandi nusatipihaati apipaahi awaindahande. Isi ami utaaho nehi naasomi otipipataahi isihiya nahatiya nehi ninaasohihi Autaahaatihomi gaahandi nehihandi nehohiyihiya ami kiyai sahi titihyaate undisawihiya asiyihiyaimatiwi bimaawi ami kinjhiya awaisawihiyaimatitaapo. ¹⁸ Utaaho nehi naasomi maipihandi nehi naasaindihai kaidihandaahi isihiya nahatiyai sahi maipihyaatisi napopise undihai napowaayopo. Isi ami utaaho nehi naasohihi titihandi kaidihandaahi maipihandi neti napuwati uripatindahandi namasi noaipapi ami asitimatitaatiwihandi naitaapo. ¹⁹ Iyataati ami utaaho nehi naasomi piwiha winihapipa nemati Autaahaatihomi asimwaatitihai sanamaindahanda isihiya taahiyihiya noaipapi maipihyaimatohipatamatiyati ami kimi kireti utaaho nehi naasohi titihandi kaidihanda isihiya taahiyihiyaisi neti Autaahaatihoaisati titihiyemati kiyaisi asitimatitaatiwihandi numwitaise. ²⁰ Isihiya winihapipa nepi isiwatawaawi, ami kapa winihapipa pihitiwi sehimiwaahohitihandi kiyai neti nunjataise. Ami isihiya pihitiwi maipihandi kiyauhi ami Autaahaatiho isihiyai gaahandi nehihandi kawindihandi waati awaindahandi pihitati noaipataise. ²¹ Maipihandi isihiya napwitaatiwihandi namoyaataise, aihai ami maipihandi noaipati awaisiho kinjhomatiyati isihiyaisi iwinjatataise. Iyataahandi kandi ami Autaahaatiho isihiyaisi kiya gaahapa wapa kamaiwi nehihandi kawindihandi noaipati kinjo awaisihomatiyati isihiyaisi iwinjatataise. Nyami Awaisiho Jisasi Kiraisihomi titihandi kaidihanda, Autaahaatiho nehihandi gaahati kanyisati asitimataati jinjapihi jinjapihi bimitihaahandi nanyinyataise.

**Jisaasiho Nyami Maipihandi Nesi Napomatati Nepasitihandaahi
Nyahi Maipihandi Kaitihaawi Watipihandi Neti Tiwamase**

6 ¹Isi ami Autaahaatiho nehi sawahometirihiretapi nyahi gaahapa wapa kamaayaati apipaahi nehihandi gaahaiwa kanyisati nanyamindimandapi nyahi piwiha napitititihawe? Nyahi kima satitihawo, “Nyahi maipihandaatihi kiyaaninihi bindahaawi kandi kiyaaninihi kaimi nutihaawo Autaahaatiho kometirihiretapi nyangi nehihandi gaahaiwa konihi kanyisati nanyamindihandi apipaahi awaindi pihitati anyaati noaipaito,” titihaawo? ²Apipaahi akiti akitinihi sandi owetise. Maipihandami watipihandi nyami ambipateti ahotindihandi nenyamaitandi Jisaasiho komi ambipateti nesi napotaati tiwamasihini nyahi kandaatihapi aimi napowaamaho. Napowaamihaawi maipihandami watipihandi nyami ambipati maarihoatihi windi ahimotati owetise. Isi ami nyahi maipihandi kiyaaninihi mwitetaati windi apipaahi kamaitihaawo. ³Ami nyahi aimi siyaati mmonihaayo. Jisaasihoaisaati maasi timaamaitohitihandi sireti noaipataise, taati nasoaanaati waapihaateti mihatihini nyami ambipati isisi nahatiyaanini nandaahaayo. Nyahi siyohitimandi Jisaasiho nyami maipihandi nesi napomasitihandaatihi nyahi koaisaati maasi timaamaitaati nandaahaayo taati nasoaanaati waapihaateti nyami ambipati nahatepi nawatisaati nandaahaayo. ⁴Iyaati nyahi waapoho nehaawi Jisaasihoaisa maasi nyahi timaamaitohitihanda ko napoti yamwainjitihandaatihi nyahi koaisaati maasi napowaati yamwaatihaayo, Autaahaatiho komi watipihanda isihya maariho owetanihi ise tiwi mmondaatiwihandisati auta Kiraisihoai animwaahipatombi ahowimati numwaasihini asoheomatipatamatiyaati nyangisangi asitimataati wanihandi asitihandeti daaya bimitihaawo.

⁵Ami nyahi Jisaasihoaisaati maasi timaamaitaati ko napwindihandaatihi napohaayo nyahi kopi giwunyaawaati maipihandaatihapi japihi nepemaitihaayo. Ami siri kireti Autaahaatiho koaisi asoheomwasipatamatiyati nyangi maipihandaatihapi neti asiyihiyaanenyamasihini koaisaati apipaahi akitinihi nyahi taawaati asiyihiyaanimatahaayo. ⁶Ami nyahi sandi aimi mmonahaayo, nyami maariho ambipati jahiho aimi Kiraisihoaisati maasi ipi titihini atawihateti tipimandaatati napomase, Jisaasiho napwindihandaahi maipihandi nyahi maaritaati kiyohitihandi apipaahi kandisinihi nemaitando. Nemahonihi ami nyangi maipihandi windi kandami otitihenyamati nyainjatonihini nyahi kandami maipihaiwa kanyatiwaiwa apipaahi windi kamaayaati owetitendo. ⁷Sandi kimireti nyahi aimi mmonaahiyaane, utaaho aimi napomasihura ko maipihandi kaitandihandi owendaise.

⁸Isi ami nyahi aimi Kiraisihoaisaati maasi nyami ambipati maariho jahiho nesi napowaamahaayoni koaisaati maasi asiyihiyaanimatito taati

nyahi aimi gwinyaahaayo. ⁹Iyaati ami nyahi aimi sireti mmonahaayo. Kiraisiho aimi napomatati animwaahipatombi Autaahaatiho ahowimasihi nepati sohoemainje. Isi ko jahira apipaahi windi namaapwitaase ami isihiya napwitaatiwihandi koaisi neti anitisati windi maawiwatiso. ¹⁰Iyataati sandi Jisaasiho napwindindi isihiya maipihandi kiyohitihandi neti dawaatemaitandi nehi naasaindihahi napotaise. Iyati ami wani ko asoheomatati Autaahaatihoaisati maasi bindataise.

¹¹Isi sahi siri kireti satiwi gwinyaapise, nyahi maipihandi kiyohitihandaatihapi aimi napowaamihaawi kandi windi kamaayihaayo. Iyaati Autaahaatihoaisaati maasi bindihaayo nyahi Jisaasihoaisaati maasi timaamaitohitihandaaho tiwi gwinyaapise. ¹²Aisaihi sami ambipati napoti namasaatitandihateti maipihandi windi apipaahi ahimotati ami windi maasinjatane. Siyati maasinjatonihahi sahi kandami sami nehi ambipati windosiwaiwa kaiwise satiwaiwa apipaahi windi kamaitaatiwo. ¹³Aiwi sahi sami ambipati wapa ikwiri auhirisangi nepi maipihandi apipaahi windi namunyawise apipaahi gimunyaatati titihimetihaiwa kapaara kaitaatiwo. Sahi windi samaiwi namapi sami ambipati isihiyaati nahatiyaati nesi Autaahaatihoapihi noaipapi nasoaniwise. Ami sahi aimi napopi Autaahaatihoai mausondaatiwihiyaatamataiwihiyaatangi ahosimati japihi nasamaasihi asiyihyaatimatiwihiyaatiso. Saiwa sami ambipati sahi nahatiyaati nesi Autaahaatihoapihi noaipapise, ko sami ambipati nesi kataahi titihi nga saasanotahaiwa kaito. ¹⁴Sahi saiwise samaiwise satirihireti sahi bindawaamaayopo kapetapi maipihandi sangisi jainjatati sasatati sahi winihapipa windi baiwi minjapepihirowi apipaahi kiyaatinihi maipihyaatititaapo satati kandi jainjatitando. Nehi Autaahaatiho sawahometirihiretapi komi winihapipa nehi nanihaiwi sahi japepahiritaatiwi anditisaiwati nehihandi sangisi gaahaiwa kasisati nasamindhandaatihahi wani sahi bindawaayopo.

Nyahi Aimi Noaipawaati Nehi Nga Titihahi Saasanotahaiwaami Otipatihyaanimatahaayo

¹⁵O ami kiyonaahi nyahi napitaitihaawe? Winihapipaatihi bimimaawaati nehi Autaahaatiho kometirihiretapi koaisunyaati nehihandi nyangi gaahaiwa kanyindhandaatihi bindihaayoni nyahi maipihandi kaitaano? Owe. Apipaahi owetise. ¹⁶Ami akitinihi kimandi sahi mmoniwihiyaate, utaaho womi otitihahi sahi pinowaawaahi siko noaipati sami awaisihoematati sangi otipipati nasanyati jainjatonihahi sahi komi otipatihyaatimatiwi komihatihahi bimitaapo. Isi sahi maipihandaatihahi sami ambipati maariho nesi nandaapi kandami watipihandaatihahi bindawaawi maipihaiwa kiyawaawaahi sandapi kandami wihoanijihandi sahi napopi sami ambipati maarihoaisawi ahoyawi Autaahaatihoai windi mausopi owetitaatiwihandi naitaapo. O ami sahi sami ambipati maariho nahato nepi isisi Autaahaatihomi otitihahi

pinuwi komi piwiha atiwisawaawaahi sandapi wihoanjihandi Autaahaatiho sangi sasatati Jisaasihomihetapi sahi titihi saasanotahiyaate satindihandi sami omanjititih ginunyaahohitihanda mmondaapo. ¹⁷Ami akitinihi jihura sahi maipihandi jainjatih kandami otitih bindawaawi maipihaiwa kaimbiwihyaate. Saimbiwihyaatitawaahandi kandi Autaahaatiho komi piwiha akitihaiwa nahatewaatih sangi nasamaasi nandaasih sahi sami maariho omanjititih nahandisawi katih nandaapi atiw japepihirawaayopo. Isi ami sandapi nyahi Autaahaatihoai gaare undahaato. ¹⁸Aih sahi saiwi atiw japepihirauhi Autaahaatiho maipihandami watipihandaatihapi sangi nuwati nasamaati nehiaatesamataise. Aih sahi noaipapi Autaahaatiho sawahometirihiretapi titih saasanotiwaiwaahihi kaiwi daitaatiwi otipipatihyaatimatawaayopo.

¹⁹Sahi Autaahaatihomihaiwaapi mmondaatiwi noaipati samiheti watipimetih kandapi namati nini isihya kiyohiwaiwaapi nasisati kandaato kaiwetapi Autaahaatihomihaiwaapi sahi mmondaatiwo. Jihura sahi sami ambipati maariho nahandi kandinih isisi kihiyaisawi kainiwi ami maipihandi titihimetahaiwa kaimbiwihyaate. Sahi saimbwihyaatisi ami wani siri kireti sami ambipati maariho nahandi nepi isisi Autaahaatihomi otitih nandaapi bimaawise, nehi Autaahaatihomi titih saasanotiwaiwamaahihi otipipatihyaatimatitaatiwo. ²⁰Ami sahi jihura maipihandami otitih pinowaawi noaipapi kandami otipipatihyaatimatawaawi Autaahaatihomi titih nga saasanotiwaiwaatih sahi windi pinamaayopo. Owetise. ²¹Iyataati jih maipihaiwa sahi kiyohiwaiwaapi wani sangi taati masindimandaahi wapa gaahaiwa windi apipaahi namehopo. Owetise. Sahi saiwa jih kiyohiwetapi noaipasitihandih sami napwitaatiwihandih. ²²Sandindaahandi kandi wani aimi sangisi sami maipihandaatihapi Autaahaatiho nuwati nasamaasih sahi noaipapi komi otipipatihyaatimatawaayopo. Sahi komi otipipatihyaatimatauh wapa gaahapa samiheti nasoaipasitihandih siyati sahi apipaahi andititih sami maariho ambipati nahandi nehi Autaahaatihomi otipipatapaahiyawaayopo. Ami sahi komi otipipatapaahiyohitihandapi wihoanjihandi sahi apipaahi kiyaatinih asiyihyaatimatitaatiwihandih taawi newaayopo. ²³Ami maipihandami otipipati kawisohiyihyai kandi wihoanjihandi numwihi napowaayopo. Siyauhhandi kandi Autaahaatiho sawahometirihiretapi komi otipipatihyai nehihandih gaahaiwa kawisati numwindihandih nyami Awaisiho Kiraisi Jisaasihoisawi maasi timaamaitohitihanda asiyihyaaimatitaatiwihandih kiyaisi nunyataise.

**Winihapipa Otipipati Kairihiretapi Mmondahaawi Nyahi Isihyaanami
Usihya Asihya Namaatohitihandapi Gwinyaitihaawo**

7 ¹Nisi naisihyaati nisatawi Kiraisihopi giwunyaahohiyihyaate, winihapipa otipipati kairihireti sahi mmoniwihyaatisi piwiha

kima nini katitandiyohima sahi mmondaapo. Utaaho sangi napoti asoho bimihihuraahihi koaisi winihapipa anitisati iwiwatati iwinjatataise. ²Iyataati ami sahi sawanaati aimi mmoniwihiyaate, apopaati waati namaatati wariho asohoaisahaati winihapipa kaati neti warihomi ambipateti timaamahiwa wirihiramatiyati anitisati wisasausosataise. Siyati wisasausosataahandi kandi ami kaatami wariho naponahi winihapipa kaati neti warihoaisati timaamahiwati wiwisasimbipaatihapi apopaati noipati nehahaati bimitaise. ³Isi ami wariho windi namaapoti asoho bimonihura apopaati koai numasi noti wohe woaisati kiyati daayataataahi isihiya kaatapi satitaapo, “Ese, saati apopaati kihoaisati kiyati daayataise,” titaapo. O ami kaatami wariho naponahi isihiya namaatohitihandami winihapipa kaati windi maawiwatitaise. Isi ami kaati wohe woai namaataataataahi isihiyaami ndiheti kaati isihiya namaatohitihandami winihapipa windi neti namopisasisatise.

⁴Isi nisi naisihiyaati nisatawi Kiraisihopi giwunyaahohiyihiyaate, sangisangi siri kireti kasimatataise. Mosesihomi winihapipa sangi jainjatataamaise. Owetise. Sahi Kiraisihomi ambipatamihiyaatitiwi koaisawi timaamaitauhi winihapipa sangi windi maasiwatise. Aiwu ami sahi aimi wani Autaahaatiho animwaahipatombi ahowimati numwaasiho Kiraisihomihiyaatimatawaayopo, nyahi Autaahaatihopi otipipati gaahaiwa kiyati kaiwetapi isihiya asiyihiyai Autaahaatihopi niwumoaitihaawo.

⁵Ami nyahi yawanaanami maaritaati gwinyaahohirihireti jihu bimonihura winihapipa nyami maarihoatihi maipihaiwa gwinyaahohiwaiwai neti nyami ambipateti anyaatu awaindemataise, nyahi kaiwa kaitihaawo. Aihu nyahi nehi napwitahaahandami maipihaiwaahihi nga kainjaahiyaane.

⁶Jihura sainjaahiyaaninindaahandi kandi wani nyangi Autaahaatiho winihapipa kapa neti nanyapuwati nyaiwatimbipaatihapi nuwati nanyamaati nehahaatenyamataise. Aihu kapa nyangi windi nyaiwatati manyinjatise. Owetise. Aihu ami nyahi winihapipa jipatipindimbipaami jahirihireti Autaahaatihomi otipipati gaahaiwa kiyahaamaayo. Owetise. Sandi apaapimahe, nehi winihapipa kapaatihapi nyangi Kiraisiho nanyamaasi napwihi Autaahaatiho Itipihoni nanyamisihomi daihira maariho wanihoetapi Autaahaatihomi otipipati gaahaiwa kiyaati kawisahaawe.

Isihiya Maipihaiwa Kiyohiwaiwa Winihapipa Neti Sahi Saiwihiyaate Undati Nunjindihandapihaare

⁷Isi ami nyahi piwihani napitititahaawe? Winihapipa sawandipi maipihande titihaawo? Apipaahi owetise. Winihapipa sawandipihini titihi gaahape. Siyataahandi kandi winihapipa kapa ningisi nisi maipihandametirihireti siretisi mmome ndati neti nanisihini nini mmonataayo. Ami windi winihapipaapimetanaahi kahapaamapipa isihiya usaamihaiwaapi nisi maariho nindositihandi titihimetihande ndi nini windi mondaanihe, ami winihapipa windi satati, “Kahapaamapipa

usaamihapaapi kinyi maariho windi maahindone,” tati kamaatonaaho. ⁸Iyataati maipihandi winihapipai neti kandami daihiremati kapetapi neti nahatewa kihaiwa kihaiwa isihya usaamihaiwaapi ningi nisi maariho nanitimanati nindotaise. Ami winihapipa owendaataahi maipihandi isihya kiyohitihandi napoti owendaise. ⁹Iyataati winihapipa satati, “Kinyi titihimetihaiwa saiwa saiwa windi kamaime,” tati katimbipa nini windi monataahura jihi ningi nehi nanihaindi nundi napitaindi bimambitihonine. Jihi saimbitihoninindaahandi kandi winihapimba saiwa saiwa kinyi windi kamaime timbipa noaipati nisi maarihomi ndihai neti nanorihaasihi niwahonini saindi mmotinataayo, nini maipihandi kaitandihandihini nisi maariho ambipateti noaipati awaindematataise ndo. ¹⁰Siyati maipihandi noaipati awaindematati nisi maarihoi neti tiwihini napotaise. Ami winihapipa piwiha sa ka Autaahaatiho jihi ahiyataise, nini nga itatamaniniti bimitandihandi nanimitotati Autaahaatiho jihi ahaimbipa ami ningisaahi daahi napwitandihandihini naninyataise. ¹¹Sandi maipihandi nisi omanjititihini ahotindihandi winihapimbetapi daihira mmonati ningi asireti jinjaipindati sandati, “Kinyi utaahonji maipihonjisi kinyi maipihandapi piwiha nepi napome,” ndati niwihini nisi maariho napotaise. ¹²Isi ami winihapipa sawandipihini nehi Autaahaatiho sawahoaapihapi nasahapaare. Siyahapaasi isihiyai nehi titihitahaiwaahihi kaitaatiwihira daihira neti nunjataise. Iyati ami isihiyai kapa nga iwitatamanitandihapaare.

¹³O ami siyonaahi nini sandi, “Autaahaatihomi winihapipa apipaahi titihini gaahapa ningi napwitandihandi naninyataise,” titando? Owe. Apipaahi owetise. Sandihini maipihandi nisi omanjititihini ahotindihandi kiyataise. Autaahaatiho winihapipa ningi nitatamanitandi ahaimbipa nisi maipihandi neti kapetapi napwitandihandi ningi naninyataise. Ami siyataati kandametirihireti neti ausaimanindando. Isi ami siyati winihapipetapi isihyaami maipihandi kiyohiwaiwa isihya mmondaatiwi neti ausaimaninani apipaahi maipi maipihandititandi nisiheti maipihanduni winihapipauni ahondaati nisi maariho ambipati neti tunati yahwinataise. ¹⁴Iyataati nyahi aimi mmonihaayo, Autaahaatihomi winihapipaahihi Autaahaatiho gwinyaasirihiretapi neti nyangi nanyisataise. Kapa saihihandi kandi ninihini maapi nehi utaahonine. Aindi nisi maipihandi kiyohitihandi neti nanipuwati nehi kandami otipipatihoninematipatisati niwatataise. ¹⁵Ami nini wapa kaitandi maaritohipipa kapa nini windi kamaayo, owetise. Namati nehi wapa nini kaitandi apipaahi pondamasipipaahihi napaititi kiyataayo. Sandi saindi ponimetahandihinihi kiyohitimandapi nini napindapi kiyo ndi windi gimaanunyaatati apipaahi pondataise. ¹⁶Iyataati nini wapa sapa sapa windi kamaitando ndi nini maarimitohipipa kiyohitindi neti sireti nanisataise, nini Autaahaatihomi winihapipaapi titihini gaahape

ndaato. ¹⁷Isi ami sandi nini kiyohitimandi nini kiyataamaayo. Owetise. Ami maipihandi nisi ambipateti ahotindihandi ningi neti nanipinjati kaime ndihi maarimitohiwaiwa napaititi nini kiyataayo. ¹⁸Aihi nini saindi mmonataayo, gaahandi nisiheti apipaahi windi ahimotise. Windi siyati ahimotihiti titihi gaahandi nini kaitandi apipaahi maaritohitihandi windi bairi nga kamaayo. ¹⁹Aindi ami gaahandi nini kaitandi maaritohitihandi windi kamaindi namati nehi maipihandi kandapi nini windi maarimitohitihandihiti kiyataayo. ²⁰Isi ami nini wapa windi kamaitandi maarimitohitihandi kiyataataahi sandi nini niwahonini kiyataamaayo. Owetise. Namati nehi maipihandi nisiheti ahotindihandi neti ningi nanipinjati kaime ndihi nini kiyataayo.

²¹Aihi ami nini saindi mmonataayo, nisiheti windi apipaahi watipihandi ahondaati neti nanisapusihiti nini titihi gaahandi kaitandi maaritataahandi kandi nini nehi maipihandi titihimetihandihiti neti kiyataayo. ²²Saindi ami nisi maariho Autaahaatihomi winihapipaapi nga biyati maaritataise. ²³Saihihandi kandi ami nehi winihapipa kapai wapa maipihandami watipihandi nisi ambipateti ahotati otipipati kiyataati nini gwinyaahohitihandi amitihetapi Autaahaatihomi winihapipa nini gaahape tohipipaisati neti tunati yahwinataise. Iyati sandi tunati yahwinjitimandi ningi neti daahi maipihandi nisi ambipateti ahotati otipipati kairidihandaatihiti nipatisati nanipuwataise. ²⁴“Ese no, nini utaahonini nisi maaritandihandi apipaahi owehonine. Ese no utaaho diyaamahonihiti kimandi maipimandisati ambipati napwitandihandaatihiti nanimaasi naipatetapi ningi japihi nanimaitaindihiti?” ²⁵Ningi sandi sanetihihandi kandi nyami Awaisiho Kiraisi Jisaasihomihetapi Autaahaatihomi ningi ambipati napwitandihandaatihiti nanimaasi naipatetapi nuwati japihi nanimaasihoi, “Kinyi gaahone gaare,” undataato. Iyataati ami nini sendaayo, nini niwahonini nisi amitihaara Autaahaatihomi winihapipa nga iwinjapepihiriti ami nini nehi nisi ambipatamihaiwaara maipihandami watipihandaatihiti bindataayo.

Kiraisiho Nyami Maipihandi Nenyamati Komi Itipihoni Nyangi Nanyinyataise

8 ¹Isi ami isihiya Kiraisi Jisaasihoisawi maasi timaamaitiwi bimohiyihiyai Autaahaatihomi windi samunditaise. “Sahi sami maipihandapi piwiha naitaatiwo,” undati kiyaamiheti piwiha neti windi yahomaawutaitaise. ²Sandi apaapimahe, ami Itipihoni komi otipipati Kairidihanda asiyihyaaninimatitihahandi nyangi nanyinyati Kiraisi Jisaasihoisati neti nyamaamaisiho maipihandamuni napwitihahandami watipihandaatihapiti aimi ningi nuwati nanimaati nehahaatenimasihandapito. ³Nyahi nga Autaahaatihomi winihapipa japepihiritihaawi watipihandi isihyaanami ambipateti nga ahimotati

nenoahindaati kandaahi maipihandaatihapi winihapipa nga windi neti Autaahaatihomi ndiheti saasanotahiyaanemaanyamase. Saihi namati Autaahaatiho sawaho wapa kiyati kapetapi nyangi japihi nanyamaataise. Iyati maipihandami watipihandi nyami ambipatetapi nemataise. Sandi komi Mwaahoai maapi natausaasihi nasati isihyaami ambipati maipihandisihatamatiyahati nesitihandaahi Autaahaatiho kiyataise. Iyati Autaahaatiho Kiraisihomi ambipati neti kataahi maipihandi piwihaapihemati kandami watipihandi neti owemataise. ⁴ Autaahaatiho sandi saindindi apaapimaahae, nyahi wani nyami ambipati kanyatirihireti dahomaayaati komi Itipiho kanyatirihireti daayohiyihyaanini komi winihapipa titihi gaahaiwa gaamapi kaiwise tiwaiwa nga kaitihaawe.

⁵ Iyataati isihya kiyaaami nehi ambipati kaundirihireti daiwi bitohohiyihyai nehi kiyaaami ambipatami maaritiwaiwaahihini anitiwi isiwatawaayopo. Iyataati ami isihya Autaahaatihomi Itipiho kaundirihireti daayohiyihya ami nehi Itipihomi maaritaati gwinyaasirihireti nepi gwinyaitaapo. ⁶ Ami isihya kiyaaami nehi ambipatihi kaundiwaiwaahi gwinyaapi nehi kaiwaapaahiyohiyihya Autaahaatihoai windi apipaahi mausondaapo. Ami isihya nehi Autaahaatihomi Itipiho kaundirihireti daiwi nehi Itipihomihaiwaapaahiyohiyihya Autaahaatihoai usowi kiyaaami maariho gaatati wiwititaise. ⁷ Isi ami isihya nehi kiyaaami ambipati kaundirihireti daayohiyihya siya noaipapi Autaahaatihomi tiworisaimatawaayopo. Sandi apaapimaahae, ami kiyaaami winihapipa windi baiwi atihomisawaawi kiyawaayopo. Isi kiyaaami apipaahi Autaahaatihomi winihapipaami otitihini pinamuwi windi minjapepahiritaapo. ⁸ Isihya nehi kiyaaami ambipati maaritirihireti daiwi bitohohiyihya siya Autaahaatihoai nepi maariho windi usaamaawitaapo. Apipaahi owetitaise.

⁹ Ami sahihi sami nehi ambipati kasatirihireti daiwi bindawaamaayopo. Owetise. Nehi Autaahaatihomi Itipiho sami maarihoatihi otipipati kiyati jainjatonaahi Itipiho kasatirihireti daiwi bimitaapo. Isi ami isihya wowaati Autaahaatihomi Itipiho Kiraisihomihetapi nepi kiyaaami omanjititihini windi kimwaurimwinati otipipati kamaayataataahi so saati Kiraisihomihyaamaahae. Owetitaise. ¹⁰ Ami sami ambipatihi maipihandapi napoti namasaatitaise. Siyonihandi kandi ami Kiraisiho nasati sami maariho omanjititihini bindataati neti Autaahaatihomi ndiheti ainahiyihyaati saasanotahiyaatesamasitihandi sami maarihoai komi Itipihora neti asohoesamataise. ¹¹ Iyataati ami Autaahaatiho Jisaasihoai animwaahipatombi japihi ahowimati numwaasihomi Itipiho sami omanjititihini bimonaahi Autaahaatiho kimiko kiraisihoai animwaahipatombi ahowimati numwaasiho komi Itipiho sami omanjititihini bimisihomi watipihanda sami ambipati napoti namasaatitandihati neti asipatesamaitaise.

**Autaahaatihomi Itipiho Nyangi Sanyatati Sahi Autaahaatihomi
Mwaayaati Maatiyaate Nyatati Neti Anyusaataise**

¹² Isi nisi naisihyaati nisataiwi Kiraisihopi giwunyaahohiyihyaate, nyami ambipati maaritindihandami otipipati iwiwihaamaayo kati kanyatirihireti daitihaawo. ¹³ Isi ami sahi nehi sami ambipati maariho jahihomi kasatirihireti kaiwi bindawaawaahi Autaahaatihoi apipaahi windi sahi mausondaapo. O ami Autaahaatihomi Itipiho sangi jatatamanati anditisaihonihi sami ambipatami maipihaiwa namawaawaahi sahi Autaahaatihoi usopi asiyihyaatimatitaapo. ¹⁴ Isihiya Autaahaatihomi Itipiho daihira nunjirihira daayohiyihya siya Autaahaatihomi mwaaya maatiya manyinyaare. ¹⁵ Sahi yaiwi napwititaatiwiho maariho newaamaayopo, ami sahi jahira yaitaatiwo. Itipiho sangi neti aimi Autaahaatihomi manyinyaatesamataise. Saihi sahi sami maarihoatihapi sahi satiwi Autaahaatihoi, “Apo, nisi apo apore,” undiwi gaapundawaatopo.^a ¹⁶ So Autaahaatihomi Itipiho satati nyami maarihoaisati neti timaamaitati nyangi sanyatati, “Sahi Autaahaatihomi manyinyaate,” nyatati neti anyusaataise. ¹⁷ Aihini nyahi Autaahaatihomi manyinyaaninisi komi manyinyaapi kahapaamapipa gaahaiwa Autaahaatiho neti ahiwiwaiwa nyahi newaati nyamihaiwaatitaise. Iyaati ami Kiraisihopi Autaahaatiho kahapaamapipa ahiwiwaiwaisangi koaisaati nyahi newaati nyamihaiwaimatitaise. Ami nyahi Kiraisihoaisaati maasi yaasati naanjihaiwa nehaawaahi ami komi yundanyihaiwa nyahi koaisaati maasi naito.

Ipotihura Autaahaatihomi Yundanyiha Nyahi Naitihaahiyaane

¹⁸ Nini saindi mmonataayo, wani kahapaamapipa ambipati maariho yaasati naanjihaiwa nehohiwimaiwa ipotihura Autaahaatiho komi yundanyiha nausainjitihandi neti ausaimanati nyangi yundanyaanyisonihi naitihaahandi windi nusatipihati daahemwaamase. Apipaahi owetise. ¹⁹ Kahapaamapipa nahataapa Autaahaatiho kiyati ahaimbipa utaatihandamatiyati maariho nuritimanati tautautati windosihi windi namoti ndiha naingaati jatataise nyahi komi mwaayaanini maatiyaanangi Autaahaatiho neti yundanyanyisati anyusaimanitandihuraapo. ²⁰ Ami kahapaamapipa nahataapa mimaipiyati ahondaise. Sandi kapaami setitando tati gwinyaasitihandaahimahe. Owetise. Autaahaatiho Adaamihomi maipihandaahi kahapaamapipa nahataapai neti mimaipiyausoasihi nopisasina ahondaise. Ahondaati Autaahaatiho kapaisi neti

^a **8:15** Judaahiyaami manyinya kiyaami piwiha Ibiruhaara sapiyai saundiwi, ‘*apa apore*’, undiwi ambihundawaatopo.

jahira titihiwati itatamanitandihuraapi kahapaamapipa jatataise.

²¹Kahapaamapipa Autaahaatiho kiyati ahaimbipa siyati jatataise, ipoti asisiha weti kapaami maipitati nopisasinati napoti namasaatitandihandi neti wisasati napusitihandaatihapi Autaahaatiho sawaho nuwati nesipausaasonihi nyahi komi mwaayaanini maatiyaanamataiwi noaipapi gaatiwi windi maipitiwi napopi namaamasaatitaatiwo.

²²Nyahi aimi mmonihaayo, kahapaamapipa nahataapa Autaahaatiho kiyati ahaimbipa apopaati maaha namwitandi detitihya yaawihya nehotipatamatiyati kandinihi nahandi yaawihya nehotimi nasati wanisangi taati nehotataise. Iyataati Kahapaamapipa nahataapa wani kimuraisangi kapaanihi nehotati ngoti otitimi kandinihi taati nasataise. ²³Iyataati nehi saiwa kahapaamapipaahi siyataamaise. Nyahi Autaahaatiho ipoti gaahaiwa nanyamitandihaiwaami jihya namasati komi Itipihya nanyamihi omanjititihya bimisawihyaaninisangi maawi nyami ambipati maariho yaasihi nehotaati gowaati bindihaayo. Iyataati Autaahaatiho nyahi Kiraisihopi giwunyaahohiyihyaanangi apipaahi kiyaanangisihya nanyamaati komi mwaayaani maatiyaanenyamati ami nyami ambipati maipitati napoti namasaatitandihati nemati asipati nanyamitandihura noaipane taati jatahaayo. ²⁴Ami nyahi maipitaati napowaati namasaatitihahandaatihya bimonihya Autaahaatiho sawaho ndihya nanyorihyaati ko nyangi nyatatamanati nyami ambipati asipatenyamaitandi jatimi niyohitihanda maipihandaatihapi japihi ko nanyamaataise. Iyataisi ami nyahi wapa naitihaawi jatimi niyohipipa aimi mmonaati nehaawaahi windi nehihandi minjatito. Nyahi aimi mmonaahiyaane, utaaho wo wapa aimi akipipa mmonati netaataahi windi jatimi namutaise. ²⁵Ami nyahi wapa sangi mmonaati namehaawaahi windi pohipimaayaati kiyaaninihi biyaati kapa naitihaawi jatito.

²⁶Siyaati nyahi jatihaawi biyaati andititaati maarihoaatihya ahapa ahapaapo taati titihya gwinyaitihaahandi watipihandi owendaise. Nyahi andititihyaahandi watipihandi owetihya namati Autaahaatihomi Itipihya nasati nyangi ikwiri nanyinyati nyatatamanati anditinyaiwati nyami maariho omanjititihya maahomwaaŋi windi apipaahi namusaatahaiwa pihitaati mitaahi nitanaati gwinyaahohiwaiwa neti nyapi nanipimati Autaahaatihoai nunyati kanyundataase. ²⁷Saihi Autaahaatiho isihyaanami maarihoaatihya gwinyaahohiwaiwa mmonahosi komi Itipihya gwinyaati Autaahaatiho sawahoai kaundiwaiwa mmonataise. Sandi Itipihya nyami maariho omanjititihya gwinyaahohiwaiwa neti nyapi nanipimati titihya Autaahaatiho nyahi komi isihyaanapi ginyunyaasirihiretemati nyahi Autaahaatihomi isihyaanapi Itipihya Autaahaatihoai piwaanyundati kanyundihe.

²⁸Aihi nyahi sireti mmonihaayo, kahapaamapipa gaahaiwa maipihaiwa nahataapa nyangi nanyoapisihya nehohiwaiwa Autaahaatiho

neti nyangisati maasi otipipati kiyati nepemaisihi kaiwetapi nehi gaahandihahi nanyoaipasahi nyahi Autaahaatihoi maariho nunyohiyihyaanini sawaho komi gwinyaasiwaiwa kawitihawwi gaanyatihi nasohiyihyaanini nehaayo. ²⁹ Ami sandi apaapimaahae, isihyaapi Autaahaatihoi komi maarihoatihi jiji satati, “Isihya siya nisihyaimatito,” tati aimi mmonati usitiwisawihiyai komi Mwaaho Jisaasihomi ndimaahomwaaŋi ambipati dahopa kiya naitaatiwi isihya yapipatambihyaami otihatihapi neti tipitapaati yandihemataise. Kiya saisaihi komi Mwaaho Jisaasiho noaipati komi saingoya sanaapwisa Autaahaatihomi mwaaya maatiya taahiyihyaami saho jiho awaisihoematitanda. ³⁰ Iyati isihya siya nisihyaatito tati Autaahaatihoi jiji mmonati neti ahiwisawihya koenda napitaatiwi nunjenati gaundataase. Iyati siya isiya koenda napitaatiwi nunjenati gaundisawiya atiwi nasauhiihyai Autaahaatihoi nehi sawaho gwinyaasitihanda kiyai saundataase, “Sahi isihyaati nisi ndiheti sami maipihandi owetati titihi saasantahiyaate,” undataase. Iyati isiya siya Autaahaatihoi saundati sahi titihi saasantahiyaate, undisawihiyai ko numwaaati sawahomi yundanyiha kiyai yundanyaawisataise. Aihi kiya Autaahaatihomi yundanyiha nepi yundanyayawaayopo.

**Autaahaatihoi Jisasi Kiraisihoetapi Nyangi Komi Maariho
Nanyamindihandi Kandinihi Nyaiwatati Nyatatamanataise**

³¹ Ami saiwa Autaahaatihoi nyangi sanyiwimaiwaaapi nyahi satitihawwi. “Ami Autaahaatihoi kimo nyami Autaahaatihomatati nyatatamanati nyainjatonaahi utaaho wo nyami tiworihomatati neti nyangi nyawati mimaipimaanyitaise. Apipaahi owetitaise,” taati gwinyaitihawwi. ³² Autaahaatihoi komi Mwaaho Jisaasihoi nehi naasohitihii apipaahi maariho yaawihihandi kandi windi neti maapatisati nehi nanihiyati nanyinyataise. Ko siyati komi Mwaahoaisisi nanyinyahosi ami kahapaamapipa gaahapa nahataapa asakiyati nehi nanihiyati nyahi komi isihyaanangi nanyamitaise. ³³ Nyahi isihyaani Autaahaatihoi satati, “Sahi nisi isihyaatimatitaatiwo,” tati komi ikwiri ahinyihi noaipawaati komihyaanimatohiyihyaanangi utaaho maahiwo sanyatitaise? “Sahi maipihandisawihyaatisi piwiha naitaatiwo,” nyatitaise? Autaahaatihoi sanyatitandihohi nyangi aimi sanyatise. “Sahi nisi ndiheti titihi saasantahiyaate,” nyatise. Isi utaaho wo neti piwiha nyamiheti yahomaanyutaitaise. Apipaahi owetitaise. ³⁴ Utaaho wo nyangi samaanyatitaise “Sahi sami maipihandapi piwiha naitaatiwo,” maanyatitaise. Owetise. Kiraisi Jisaasiho nyami maipihandi nenyamaitandi ipi titihi atawihateti napwihi Autaahaatihoi jahira ahowimati numwaasihi Autaahaatihoiisati watipihandi neti awaisihoematataise. Iyataati utaaho wo nyangi sanyatati, “Sahi sami

maipihandapi piwiha naitaatiwo,” nyatitaihi kandapi Jisaasiho nyami ndimaahomwaaŋi neti isiwati nyapi nanipimati Autaahaatihoaisati taati konihi piwanamaase. ³⁵Isi wapa napaamapaanihi neti nyangi Kiraisiho maariho nanyinyati nyainjatisihoatihapi nehahaatenyamati nanyopisaisitaise. Naanġhaiwa nyami ambipateti yanyamwaataahaiwaaro, e mimaipiyaati nopisasinati bimohitihando, e isihya naanġhaiwa nanyinyawi tipi mwinyapi nanyopisasohtihando, e jarihoru, e ikipipa nandapa apipaahi owetati somaahiyaanini bimohitihando, e maapi isihya ami kahapaamapipa nyangi nyapi nepinyamaitaatiwihaiwaaro, e nyahi timbipa newaati napowaati owetitihahando? Owe. ³⁶Iyataati saiwa sapa Autaahaatihomi isihyaanini sikiyaati naitihaahaiwapaahi Autaahaatihomi piwiha wa satati jipatipindise:

“Nyahi kinyi isihyaaninimatonihi kandapi asisiha nahateweti isihya siyihyaanangi nyawawaayopo.

Aiwi kiya nyangi nehi kiyaami maasapiho sipisipihandi satihandi tiwitaatiwihandamatawi nyasonawaayopo,” *Aunihihiri 44:22*
tati aimi jipatipindise.

³⁷Isi ami saiwa kahapaamapimbaahi nyangisi nanyoaipahonihi nepi naisaihihandi kandi Jisaasiho nyangi maariho nanyamisiho konihi nanyinyami niyonihi koetapi nyahi saiwa nahatewaisi nga apipaahi newaati ipihatisaati tiwandawaamaati noaipaito.

³⁸Sandi ami apipaahi akitihihi nini mmonataayo, Kiraisiho nyangisi maariho nanyamisihoatihapi wapa ahiwati neti nyangi windi nehahaatenyamati namaanyopisaisitaise. Nyahi napwitihahandisangi ami asiyihyaanimatitihahandisangi windi nehahaatenyamaamaitaise. Yamihapataatihapi Autaahaatihomi otipipatihiya enjerihiyaisangi ami yamihapataatihapihaiwa wiwa watipihaiwaisangi windi nehahaatepinyamaamaitaapo. Kahapaamapipa wani ahotiwaiwaisangi ami kahapaamapipa ipoti ipoti noaipataahaiwaisangi nyangi Jisaasiho maariho nanyamisihoatihapi windi neti tipitapaati nehahaatenyamaamaitaise. Kahapaamapipa gimunyaatati watipihaiwaisangi sandi windi kamaitaise. ³⁹Kahapaamapipa mihaati yamihapataatihapaisangi maapi yatihhi yapipatambihapaisangi ami kahapaamapipa wapaisangi Autaahaatiho kiyati ahaiwaiwaamihatihhi ahimotise. Nyami Awaisiho Kiraisi Jisaasihomihetapi Autaahaatiho maariho nyangi nanyamisihoatihapi nyangi nyaiwitapaati yandihhi nehahaatenyamaitandihaiwo.

Autahaatihomi Isihya Isiraherihyaapi Porihoai

Maariho Naanawisati Yaawataise

9 ¹Nini utaahonini Kiraisihomihonisi piwiha kima katitandiyohima apipaahi akaahaare. Nini windi jaipindi kandaamaato. Autahaatihomi Itipihho nisi amitihha maariho gwinyahohitihandi neti

nitatamanati gwinyaasihi piwiha akitiha nini kandaato. Nini windi jaipindaamaato. Itipihoaikasi kinyi piwiha akitihaare tati nisi amitiha maarihoaatihi kandataase. ²Piwiha nini katitandiyohiha kima siyati nini nisi maariho omanititih awaindi naananasati yaasataise, niwahonisi isihiya Isiraherihyaapo. Nini kiyaami ambipati jitipatamihoninindaati sandi kiyataayo. ³Niwahonisi ambipati jitipatami isihiya Isiraherihyai Autaahaatiho japihi apipaahi numwaitandi awaindi gwinyaataayo. Iyataati nini niwahonisi Jisaasihoaikasi timaamaitohitihandaatapi Autaahaatiho kiyai japihi numwaitandi ningisi namandipati nehahaatenimaito ndi nisi omanititih kiyaapimainjih nini gwinyaataayo. Ko siyonaahi nini maaritito. ⁴Iyataati nyahi Judaahiyaanangi Autaahaatiho satati sahi nisihyaatimatitaatiwi Isiraherihyaate, nyatati ambipati nanyoasati ahinyihihyaanane. Iyati sahi nisi manyinyaate, nyatih komi manyinyaanimataahiyaanane. Komi manyinyaanimatonih Autaahaatiho komi gaahaiwa watipihaiwa nanyisati nanyamihihyaanane. Iyati satati sahi kiyatinihi nisihyaatimatitaatiwe tati piwiha watipih katanyasati nanyinyati ami komi winihapipa nyangi nanyinyataise. Komi anj awaindihandaatihi aunihihiri kataati gaapunditihahaiwa nanyinyataise. Autaahaatiho kahapaamapipa gaahaiwa nanyamitandi jih timanati nyami asoya asisai kaundiwaiwa nyahi nehaayo. ⁵Iyataati nyami asoya watipihya awaisawihya nyahi kiyaamihetapi noaipapi nasohiyihya Autaahaatihomi isihyaare. Aih nyami ambipati jitipatetapi Kiraisiho noipati nehi utaahoematataise. Iyati ko kahapaamapipa nahatewaami mitiho awaisiho napwise nyahi koaisi mepi autahewaumaitihaawo.

Komihiyaimatitaatiwihyai Autaahaatiho Aimi usonati Namihaase

⁶Iyataati nini windi sandaamaato, Autaahaatiho Isiraherihyaanangi gaahaiwa nanyisati kanyitandi piwiha jih timanati katiwaiwa timahiyati namandipatati akipipa owe daamaato. Sandi Isiraherihya nahatiya nanihaiwi topitaata kiyaanihi nisi isihyaatitaapo tati Autaahaatiho windi kamaatise. ⁷Abiraahamihomi jitipatetapi namoyaatiwi noaipahohiyihya nahatiya Autaahaatihomi manyinya akitihiyaimataawaamaayopo. Owe. Sandapi jihura Autaahaatiho Abiraahamihoi Saundise, “Isaakihomi manyinyaahi kinyi manyinyaatitaapo,” undise. ⁸Iyataati sandi siyate, manyinya nehi isihyaami ambipati maariho gwinyaahohirihiretapi namoyaatiwi noaipapihiya Autaahaatihomi manyinyaimataawaamaayopo. Owetise. Manyinya Autaahaatiho piwiha timanati katirihireti namoyaatiwi noaipahohiyihyaahih Autaahaatihomi naisoho Abiraahamihomi manyinya akiyihiyaimataawaayopo. ⁹Iyataati Autaahaatiho Abiraahamihoi piwiha jih timanati kaundisiha saundataase, “Titih asisih niwahonini ahiohurura jahira napiti

sasanyuraasangi jainjasanihi Saraahaati metihonji wohonji namwitaise,” undati kaundise.

¹⁰Iyataati ami saiwaahimahe, nyami asiho Isaakihoai aimi Saraahaati namwihi noaipati gwinyanati awaisihotati kinaungwiha titaahiwaiwa sanaihihura apopaati Repekaahaati neti wirataise. Aihi kaati metihuri wohuri yanatipihuri Isaakihoai namounyataise. ¹¹⁻¹²Iyataati meti awitipihuri sangi noaipasihura Autaahaatiho kahapaamapipa isihyaami otihatih nehi sawahomunyaasirihireti gwinyaasipipa kurami woaisi numwaati koetapi kaitandi kandapi Repekaahaati Autaahaatiho saundataase, “Metiho jihi napisih ipotihomi otitih sanutaise,” undataase. Meturi sangi noaipapi sanaatami gwisahaatihi kipwindimi ami kahapaamapipa gaahaiwaisangi maipihaiwaisangi wapa kamaimi owehandi Autaahaatiho sandi kandaase. Sandi Autaahaatiho nehi sawahounyaasirihireti japepihirati meturi naasohi naasohi komunyaasirihireti wapa kamaimihandi nehi metiho woaisaahihi numwaati komihetapi Autaahaatiho komunyaasiwaiwa kaitandi kandaase. ¹³Iyataati sandapi Autaahaatiho komi piwiha jipatipindisahaatihapi satise. “Jekopihoai nini maariho nunyataati ami Isauhoai nini maariho namunyo,” tati katise.

¹⁴Isi ami sandi Autaahaatiho nehi ko sawahounyoaasirihiretapi Jekopiho komi ambipati witi Isiraherihoi maariho nunyati koetapi kahapaamapipa kiyataati ami Isauhoai namasitimandapi nyahi sataati Autaahaatiho sandi apipaahi windi nga titihimetihandi kiyataise titihaawo? Apipaahi owetise. Nyahi windi samaatitihawo. ¹⁵Ami Autaahaatiho Mosesihoai saundise, “woai waati nini maariho wiwiwitandaahi wiwiwito. Aindi ami woai waati maariho asipiwitandaahi asipiwito,” undise.

¹⁶Isi ami Autaahaatiho satati isihya siya siyai nini maariho nunyati gaahaiwa kawitaano tati kawiwaiwa isihya wapa Kaitaatiwi gwinyaapi ami wapa kiyohitihandaahimahe. Owetise. Nehi Autaahaatiho sawahometirihiretapi isihyai maariho nunyati gaahaiwa kawisataise. ¹⁷Ami Autaahaatiho komi piwiha jipatipindisahaatihapi utaaho wo yapipati Isipihandaahapi maipihohi awaisihoai saundise.

“Nini gisi ahingisonihone. Aindi kinyi maariho neti daahi ipihatindi watipihimataayo. Nini kinyihetapi isihya yapih nahandaahiyai nisi watipihandi auta nunjati ami nisi ambipati neti awaindemasanihi kiya mmondaatiwo,” *Japihi Numwaasiho 19:16* undise tati jipatipindise. ¹⁸Isi ami nyahi sandi mmonihayo, Autaahaatiho nehi sawahometirihiretapi isihya usaisi maariho nunyati asipiwitandihiyai nunyati asipiwisati ami usai neti kiyaami maariho omanjititih daahi nawihemati nisapuwitandihiyai nawihemati nisapuwataise.

Autaahaatiho Apousatuni Ami Maariho Asipiyahore

¹⁹Sandapi sami usaati satiwi ningi nanisendaapo, o ami Autaahaatiho isihyaanangi kahapaamapipa kanyirihireti siretitanaahi nyahi

maipihandi kiyohitimandi komi ahairihireti kiyahaayo. Isi ami ko nyangi napaapi sanyatise? “Sahi maipihandisawihyaatisi piwiha naitaatiwo nyatise?” Nyahi usaanini Autaahaatiho aimi timanati kiyati satati kiya saito saito tati ahaiwaiwa newaati windi tiwandawaamaamaito ndiwi ningi sahi nanisendaapo. ²⁰ Wiwa satiwi nanisendaawi kima wihooanji kasatitaani atiwise. Sahi nehi isihyaati Autaahaatihomi ikwira kiyati ahisihihiyaate. Isi sahi isiyaati akiyihyaati maahusaatitawaawi Autaahaatihoai piwiha tiwandiwi nepi wihooanji jahira kaundawaatopo? Oniha yapipati kwaatihaihaati noti namasati kaisihoai windi satati namunjese, “Kinyi ningi kimireti saimbi napindapi nanimasapi kanise?” undati windi namunjese. ²¹ Utaaho satiho yapipati kwaatihaihaati oniha kaitandi noti ahoaisiho kwaatihaihaati naasaipiti katami neti oniha yatiwi komi watipihandi ahusotirihireti kaitaise. Iyati wa sanahiwiyati nga nehi usipipaapihuraapi kiyati ami wa asisiha nahateweti nandapa tihati waapoho niwati nanati kaitandiha kaitaise.

²² Autaahaatihoaisangi isihyaanangi ami kahapaamapipai siri kireti kanyisataise. Komi watipihandi isihyaanani nahatiyaani mmondihawwi koaisi maipihandapi apipaahi apowindihandi neti ausaimanitandi gwinyaataise. Siyati gwinyaataahandi kandi isihya kiyaami maipihaiwaapi koai apowindihandi naitaatiwihiya aimi timetauhihandi Autaahaatiho nehi nanihiyati iwinjapi notaise. ²³ Ami siyati komi apowindihandi naitaatiwihiyai nehi iwinjapi naindindi nyahi ko maariho asipinyisawihyaanangi Autaahaatiho sawahometirihiretapi gaahapa saasanotihapa nyahi newaati yundanyaitihaawi aimi jiji neti timanati ahinyiwaiwa neti ausaati nyangi nanyisati yundanyaanyitandi sandi ko kiyataise. ²⁴ Ami siyati Autaahaatiho maariho asipinyisati gaahapa sawahometirihiretapi neti yundanyaanyitandi gaatati nanyamaati ahinyisawihyaanani usaanini Judaahiyaamihatihapuni usaati Judaahiyaanami dawaatapihiyaati nyahi kimi kiyaane. ²⁵ Iyataati utaaho wo Autaahaatihomi piwiha atisati neti ausaasiho piwiha jipatipaisihaatihapi Autaahaatiho sandaase.

“Isihya nisihyaametohiyihiyai sahi nisihyaate undito. Isihya nini maariho windi namunyohiyihiyai nini saundito sahi nisi apohipati kiriwipataatihapihiyaate undito. *Oseyaahe 2:23*

²⁶ “Aindi sapihi aunahipati yapipata isihiyai nini saunditi sahi nisi isihyaatimaahe undohiyihiyai sapihi kapihi nini kiyai saundito nini Autaahaatihonini asohonini bimohihonisi manyinyaate undito,” *Oseyaahe 1:10*

tati Autaahaatiho katise. ²⁷ Autaahaatihomi piwiha atisati neti ausaasiho Aisaiyaaho Isiraherihyaapi satise

“Isiraherihya apipaahi windi gimunyaatatati awimitinati aripati nawasasaahaamatendaahandi kandi nehi apipaahi

yahingwaasisaahi Autaahaatiho japihi numwaitaise. ²⁸Iyati ami nehi apipaahi kiyaisinihi isihya yapih i nahandaahiyai Awaisiho keti neti tipitapaati usonati nemaitaise,” *Aisaiyaaho 10:22, 23* tise. ²⁹Siyati Aisaiyaaho Autaahaatiho Isiraherihyaanangi tipitapaati nyasonati usaanangi nyamaitandihandapi jih i timanati katindihande satati, “Ami Awaisiho Watipih o nyami usaanangi ipoti ipoti namoyaatitihawihyaanangi nehi nyainjati nemaanyosati nahatiyaanangi nyamahonaahi nyahi isihya Sotomihandaahiyaisuni Gomoraahandaahiyaisi Autaahaatiho nemasihi kiyaanihi owetiwimahohipatamatiyati nyamahonihi nyahi kiyaaninihi owetawaamaitanihe,” *Aisaiyaaho 1:9* tati katipatamatiyate.

**Jisaasihomi Piwiha Gaaha Isiraherihyaanangi
Maasi Japihi Nanyamaitandihaare**

³⁰Saiwa nini kandi kasatohiwimaiwaapi ko apihindaase tiwaitaawi nini sandi kima kandaato. Isihya nyahi Isiraherihyaanami dawaataatihiya windi satiwi nyangi Autaahaatihomi ndiheti sahi titih i saasanotahiyaate nyatito tiwi windi mindaahohiyihiyai kiya Kiraisihopi giwunyaahohitihanda Autaahaatiho saundati, “Sahi nisi ndiheti titih i saasanotahiyaate,” undise ndaato. ³¹Aindi ami sandaato, nyahi Isiraherihyaanini Autaahaatiho sanyatati, “Sahi nahatiyaati nisihiyaate,” nyatati ahinyisawihyaanini winihapipaatihi Autaahaatiho nyangi satati sahi titih i saasanotahiyaate nyatitandihandi ahotanihi naitihaawo taati nyami anditati napawaamahohitihandi nyahi taahiyihyaanini windi apipaahi mohondaato. ³²Sandi kiya napaapi windi mohopo? Sandi apaapimaah e. Ami kiya kiyohiwaiwa Kiraisihopi giwunyaahohitihanda kamaiwi nehi sawana satiwi otipipa gaahapa kaisaihi kapetapi Autaahaatiho satati sahi titih i saasanotahiyaate nyatito tiwunyaapi anditati napamihauhe. Aih i kiya nawiha isiya napapaapi asundusaitaatiwiheti napapaapi asundusaapi timahiyawaayopo. ³³Sandapi komi piwiha jih i jipatipindisihaatihapi Autaahaatiho komi Mwaaho Kiraisihopi nawihaapi nepemaahiwati satise

“Sahi isihyaati baiwi mmowise, sisiho awaipati aunahipati Jaiyanihoasini nawiha watipih a wa isihya napapaapi asundusaapi timihaitaatiwiha nini ahiyataayo. Ami utaaho itapaati wowaati kopi giwunyaawaahiya windi mimaiipiwimatati mamaawitaise,” *Aisaiyaaho 28:16* tati isihya Jisaasihoi ahosumapi gimaawunyaitaatiwihyaapuni numwaapi giwunyaaitaatiwihyaapuni Autaahaatiho sandi kandaase.

**Isiraherihya Titaahiyihya Autaahaatiho Isihiyai Saundati
Sahi Saasanotahiyaate Undati Usosirihireti Windi Mohopo**

10 ¹Nisatawi Kiraisihopi giwunyaahohiyihyaati naisihyaate, niwahonisi isihya Isiraherihiyai Autaahaatiho japihi

numwaitando ndi nini kiyaapi awaindihandi pihindi gwinyaati Autaahaatihopi gaapundataato. ²Nisi isihya Isiraherihiyai nini bairi usotihoninisi piwiha auta kiyaapi kandaato. Kiya Autaahaatihomi otipipati kaitaatiwi apipaahi pihitiwi maaritiwimihauho. Kiya saiwi apipaahi Autaahaatihomi otipipati kaitaatiwi maaritawaahandi kandi kiya windi titihi mohopo. ³Jisaasihomihetapi Autaahaatiho isihiyai saundati sahi nisi ndiheti titihi saasanotahiyaate undati usosirihireti kiya windi mohopo. Saiwi nehi sawana kiyai daihira wira daahiwitaatiwi anditati napamawaayopo. Aiwi kiya Autaahaatiho isihiyai Jisaasihomihetapi sahi titihi saasanotahiyaate undirihireti windi moniwi pinamaayopo. Owetise. ⁴Nini sandi kiya titihi windi mohopo ndi katohitindi apaapimaato, isihya pihitiwi anditati napamapi ami Autaahaatihomi winihapipa japepihirauhi ami sandaahi Autaahaatiho kiyai saundati sahi titihi saasanotahiyaate undati kaundataise. Ami sandihi Kiraisiho neti owemase. Ahi ami sandi Kiraisiho saindindaahi Autaahaatiho isihya Kiraisihopi giwunyaahohiyihiyai saundataise, sahi saasanotahiyaate undataise.

Isihya Nahatiyai Autaahaatiho Nga Japihi Numwaitaise

⁵Iyataati isihya Autaahaatihomi winihapipa nahataapa baiwi japepihirisaihihiyai Autaahaatiho saundati, "Sahi titihi saasanotahiyaate," undati usondandihandapi Mosesiho satati jipatipaise.

"Isihya wowaati winihapipaami piwiha japepihrohiihiyai kapetapi Autaahaatiho jinjapihi asiyihiyaimatitaatiwihandi numwaitaise,"

Pirisihiya 18:5

tati jipatipaise. ⁶Ami Kiraisihopi giwunyaahohitihanda isihiyaisi Autaahaatiho saundati sahi titihi saasanotahiyaate undisawihyaapi Autaahaatihomi piwiha jipatipindisihatihapi satati kiya windi satiwu namaasendaapo, "Diya yamihapataatihi naitaapo?" maaitaapo. Ami sandi Kiraisihoai numwaasi maapi noaatipaitaatiwihandapi topo. ⁷Aiwi ami kiya wa samaaitaapo, "Diya isihya napohiyihya bimohipipihii mihatihisangi nuwi noaatipapi Kiraisihoai ahowimapi asohoemapi numwaasi nasaamanitaapo?" tiwi namaasendaapo tati jipatipindise. ⁸Iyataati ami piwiha wa satati jipatipindise, "Autaahaatihomi piwihaahi kinyihini deti kinyi maahomwaanji mipateti ahotati ami kinyi maariho omanjitihi kihimundataise," tise. Iyataati Kiraisihopi giwunyaaitihaahandapi nyahi kopi giwunyaahohiyihyaani sa piwa ausaahohaare. ⁹Isi ami kinyi auta isihyaami ndiheti kinyi maahomwaanji nasaapi, "Jisaasiho nisi Awaisihoe," tipi katipi ami kinyi maariho omanjitihi satipi Autaahaatiho komi watipihandaahi animwaahipatombi Jisaasihoi jahira ahowimati numwaataise tipi giwunyaapaapaahi Autaahaatiho gi japihi nangimaitaise. ¹⁰Nyahi nyami maariho omanjitihi Kiraisihopi giwunyaawaati ami nyami maahomwaanji

nusaawaati auta isihya usaisi Kiraisihopi ausaawaati kaundohitihandaahi Autaahaatiho sanyatati sahi titihi saasanotahiyaate nyatati nyangi japihi nanyamaataise. ¹¹ Iyataati ami Autaahaatihomi piwiha jipatipindisihaatihapi wa satise, “Utaaho itapaati wowaati Kiraisihopi giwunyaahohiyihya windi mimaipiwimatati mamaawitaise,” tati jipatipindise. ¹² Sandi isihya nahatiyaapise ami Judaahiyaanangisuni nyami ipaahaapi dawaataatihiyai naasaipiti kiyati Autaahaatiho japihi nanyamaataiso. Iyati Autaahaatiho kimi ko nyahi nahatiyaanami Awaisihoso. Iyati ami nyahi wonini waanini ko wapa nanyamitandi gaundaati nunjehonihapa pihititi asakiyati nga nanyinyahoso. ¹³ Ami siyati Autaahaatihomi piwiha jipatipindisihaatihi wa satise, “Utaaho itapa wowaati Awaisihomi ambipati ambihitiwi gaatohiyihiyai Awaisiho japihi numwaitaise,” tati jipatipindise.

¹⁴ Isi ami kiya kopi windi gimaawunyaawaawaahi ko kiyai japihi numwaitandi napitaiwi kopi kiya gaatiwi koai nunjendaapo? Aiwi ami kiya piwiha Kiraisihopi usa ausaapi kamaatisaihi ami windi atihomisawaawaahi kopi kiya napitaiwi giwunyaitaapo? Aiwi ami Kiraisihopi isihya usa piwiha wa ausaapi kamaatisaihaahi kiya napitaiwi atitaapo? ¹⁵ Iyataati ami Kiraisihopi sangi atisohiyihiyai kopi piwiha ausaapi diya kaunditaapo, ami Autaahaatiho isihya piwiha ausaitaatiwihiyai windi natamausoasonaaho? Ami sandi kandapi Autaahaatihomi piwiha jipatipindisihaatihapi wa sandaase,

“Ese, isihya piwiha gaaha waniha nesi nasohiyihya sati apipaahi
gaahati kiyawaayopo,”

Aisaiyaaho 52:7

tati jipatipindise.

Nyahi Isiraherihyaanami Isihya Taahiyihya Jisaasihomi Piwiha Gaaha Atiwi Namehopo

¹⁶ Ami Autaahaatiho komi piwiha nesihiyai Kiraisihopi piwiha gaaha ausaitaatiwi natausaasihi nuwi ausaahauhahandi kandi isihya taahiyihya windi piwiha gaaha atiwi namehopo. Sandapi Autaahaatihomi piwiha atisati neti ausaasiho Aisaiyaaho satise,

“Awaisihope, piwiha nyahi isihiyai kaundohiha kiya windi atiwi
kiyaami maarihoatihi windi nepi kumwaamopo,” *Aisaiyaaho 53:1*

tise. ¹⁷ Ami nyahi siyaati aimi mmonihaayo, Kiraisihopi piwiha isihya ausaapi kanyatauhi atisihaawi ketapi nyahi kopi giwunyaitihaahandi nehaayo. Iyaati sa piwa nyahi atisoha Kiraisihopi komi isihya nesi napiwi ausaapi kanyatauhi nyahi atisaati nehaayo. ¹⁸ Ami Isiraherihya isihya Autaahaatihomi piwiha nesi ausaapi waapihitiwi katohiha apipaahi akitinihi aimi atiwihyaare. Atiwihyaasi sandapi Autaahaatihomi piwiha jipatipindisihaatihapi wa satise,

“Isihya Autaahaatiho komi piwiha nunyati natausaasihi nesi
yapipati nahanda gaamapi ausaapi waapihitiwi katopo. Katauhi

kiyaami piwiha aunahipi nahanda noti daayati gaamati ahondaise,” *Aunihihiri 19:4*
 tise. ¹⁹Aiwi ami Isiraherihya apipaahi akitinihi atiwi aimi mmoniwihyaare. Saiwi atiwi mmonawaahandi kandi baiwi kiyaami omanjititih nepi kumwaamohitihandapi tipwihiwati Mosesiho Autaahaatihomi maahomwaanji neti satise,

“Isihya usa nisapi atihomisawaawi nehi isihyaametiwihiyai numwaati iwitatamasanihi sahi sami mandiha aponihi naumwaaritaapo. Saindi isihya nisapi windi atihomiwi ningi windi maanopihiyai nini numwaati nisihiyemasanihi sahi apositaise,” *Winihapipa 32:21*
 tati Mosesiho Autaahaatihomi maahomwaanji neti katise. ²⁰Ami sandapi Aisaiyaaho apipaahi waati windi yamaayati Autaahaatihomi maahomwaanji neti satise,

“Isihya nisapi windi taawi mindaahohiyihya ningi nisonawaayopo. Isihya nisapi windi taawi namaasenihohiyihiyai nini noaipati iwinjataayo,” *Aisaiyaaho 65:1*
 ndaase tati Aisaiyaaho kandaase. ²¹Iyataati ami Isiraherihyaapaahi Aisaiyaaho Autaahaatihomi maahomwaanji neti sandaase,

“Isihya nisi piwiha atihomiwi ami wiretitiwihiyai japihi numwaitondi nisi ikwiri dihimwaniti nini ipiho pititaatiwati koninihi jaati bisondaayo,” *Aisaiyaaho 65:2*
 ndaase tati katise.

Isiraherihyaanapi Autaahaatiho Maariho Asipiyataise

11 ¹Nini sandi katitandiyo, Autaahaatiho komi isihya Isiraherihiyai apipaahi kiyaisinihi namataindiho? Owe. Komi isihiyai apipaahi kiyaisinihi windi namaamase. Nini Isiraherihyaamihoningi Autaahaatiho japihi nanimaasihonine. Abiraahamihomi jitipatetapi Benjaminehomihyaamihonine. ²Komi isihiyai jihi wuwanihuraapi sahi titih nisihiyaate undati usonati ahiwisawihiyai Autaahaatiho windi ahosumati apipaahi kiyaisinihi windi namaamase. Owe. Eraijaaho Isiraherihiyai piwiha neti yawutaati Autaahaatihoai piwaundindihandapi sahi mmoniwihyaate. ³Ko Autaahaatihoai saundati,

“Awaisihone, kinyi isihya ami kinyi piwiha atiwi nepi ausaapi isihiyai kaundohiyihya piropetihya siyihiyai timapi ami kinyi aritaahandi bwinanaati kasini nandapa gaarehandi tihwi nahimitaatiwihaiwa nepi yamwaapi nawatapi nosasopo. Siyauhi nini niwahonini naasoninihi bimonih kiya nisangi sohonih niwitaatiwi daapi tusihanawaayopo,” *1 Kijihio 19:10-18*
 undati Autaahaatihoai ko gosoeti piwaundiho. ⁴Eraijaaho saundihi ami Autaahaatiho wihoaanjha koai kaundisiha sahi mmoniwihyaate. Autaahaatiho Eraijaahoai saundati,

“Isihiya Isiraherihya 7,000 kaiwihya autaaahaatoho jaipitaho Bearihopi windi atotipiwesawi gaapimundiwihiyai neti niwahonisapi anitindi isiwatataayo,” *1 Kirijo 19:11*
 undati kaundiho. ⁵Wani kimuraisangi Autaaahaatoho naasaipiti kati kiyati taati Isiraherihiyai kawisataise. Jihura saundati sahi nisihyaate undati usonati ahiwisawihiyai nehi sawahomi maariho asipaindihandaahi numwaasihi bindawa Autaaahaatohoai isawatawaayopo. ⁶Isihiya wapa gaahapa kiyohiwaiwa windi apipaahi monati nehi sawahomi maariho asipaindihandaahihi satati isihya siya siya nisihyaatito tati gwinyaasitihandi japepihirati isihiyai saundataase: “Sahi siyaati nisihyaate,” undati usonati numwaataise. O ami isihya gaahapa wapa kiyohiwaiwetapi ko sandi kiyataataahi kiyai ko maariho asipaitandihandi sandi akiti asipiwisataamaise, apipaahi owe.

⁷Isi ami sandi isihya yapipati Isiraherihandaahapihya kiyaisi Autaaahaatoho saundati sahi titihi saasanotahiyaate unditandi daahohitihandi kiya windi namehohitindapi nyahi napitititahaawe? Isiraherihya nehi apipaahi yahingwaasisaahihi Autaaahaatoho saundati, “Sahi nisihyaate,” undati usosingingwaasisaahihi Autaaahaatoho kiyai saundati sahi titihi saasanotahiyaate unditandi daahohitihandi nehopo. Isiraherihya kanaahiti taahiyihya kiyaami atihiri nepi napupwi nawaatimapi Autaaahaatihomi gapipa windi atihomisopo. ⁸Sandi kiya siyohitimandapi Autaaahaatihomi piwiha jipatipindisihatihapi wa satise:

“Autaaahaatoho isihya sawana kiyaami omanjititihiti amitihya nepi nawihaamataiwi watipitohitihanda neti daahi watipumasihiti kandaahi wani kimuraisangi kiya kiyaami ndihaara windi wapa moniwi ami kiyaami atihira wapa atihomisopo,”

Winihapipa 29:4; Aisaiyaaho 29:10

tati jipatipindise. ⁹⁻¹⁰Ami sandi kandapi Daawitihito satise,

“Autaaahaatihone, kiya nandapa awaimbipa tihwi nanihohipipa kinyi nepi wirihiramataimbi nepemaipi kiyaami naahwitarihiri nepi naahusaapane. Naahusaapanipi kiyaami maipihaiwaami wihoaanjihapa kiyai kinyi maipihandi kawime. Kawimbi kiyaami ndiha kinyi nepi mwisotipi niyotipe asihatonihiti kiya windi baiwi minjapi naharito. Aimbi kinyi naanjihaiwa kiya nehohiwaiwa nepi awitimapusose kaiwaami naanjindihandaatihiti kiyaami dawaaho nasisoari kiyaanihi niyatawaatito,” *Aunihihiri 69:22, 23*

tati Daawitihito katise.

Isihiya Judaahiyaanami Dawaataatihiyai Autaaahaatoho Japihi Numwaataise Judaahiyaanani Japihi Nepemaititahaawo

¹¹Ami nini piwiha watipihya sandapi sandi katitandiyohi nyahi Judaahiyaanami isihya asakaiwi taahiyihya napepaapi

Autaaahaatiho nyangi sanyatati sahi titihi saasanotahiyaate nyatati japihi nanyamaitandihandi namewaahandi kandi nyahi apipaahi kiyaaninihi timahiyaati owetihaamaayo. Owetise. Ami nyahi Judaahiyaanami isihiya taahiyihiya maipihandi kiyauhi namati Autaaahaatiho isihiya nyahi Judaahiyaanami dawaataatapihiyai japihi numwaataise. Siyati numwaahonihi nyahi Judaahiyaanini aponyonihini naumwaarisaati namawaati japihi nepemaitaati nyami Autaaahaatihoenda napisaihi ko nyangi japihi nanyamaitando. ¹²Nyahi Judaahiyaanami isihiya yapihini nahanda maipihandi kiyauhi namati komi kahapaamapipa gaahaiwa Autaaahaatiho neti isihiya yapipati nahandaahiyai tisaahiwati nunyataise. Iyati nyahi Judaahiyaanami isihiya taahiyihiya Autaaahaatihometirihiretapi kahapaamapipa gaahaiwa namepi pohipiyohitihanda Autaaahaatihomihaiwaapi jamaamañinihauhi nehi iwinjati kometirihiretapi gaahaiwa Autaaahaatiho isihiya nyahi Judaahiyaanami dawaataatihiyai asakiyati tisaahiwati nunyataise. Isi ami nyahi Judaahiyaanami isihiya nahatiya napisaihi Autaaahaatiho japihi numwaahonihura kahapaamapipa gaahaiwa Autaaahaatihometirihiretapi asakaiwi isihiya nahatiya naitaapo.

¹³Wani piwiha kima isihiyaati sahi nyahi Judaahiyaanami ipaahaapi dawaataati bimohiyihyaatangi nini kasatitandiyo. Nyahi Judaahiyaanami ipaahaapi dawaataati isihiya bimohiyihyaamihatihini komi piwiha ausaati kaunditi kandunjitandi Autaaahaatiho ningi natanoaasihonine. Saihioninisi sati otipipati komi piwiha ausaati samihatihini nini kaitandi Autaaahaatiho ningi naninyati natanoaasipitapi baindi awaindi maarititi genanataayo. ¹⁴Kimati otipimbati nini samimatihini Autaaahaatihomi piwiha ausaati kasatiti kaisanihi sahi Autaaahaatihopi giwunyaapi gaahaiwa nesaihi niwahonisi isihiya Judaahiya sangi namwaarisiwi japihi Autaaahaatihoenda napisaihi Autaaahaatiho kiyai japihi nisi otipimbatetapi numwaito.

¹⁵Ami nyahi Judaahiyaanini yapipati Isiraherihanda Jisaasihoai ahosumahohitihandaahi Autaaahaatiho komi isihiyaanangi ahosinyamataise. Sandi nyangi ahosinyamasitindaahi isihiya yapipati nahandaahiyai saundati sahi nisi naisihyaatimatiwise undati numwaasihini kiya noaipapi Autaaahaatihomi naisihyaaimatawaayopo. Isi ami nyahi Judaahiyaanini nyami yapipati Isiraherihanda nahatiyaanini japihi nepemaitaati Kiraisihopi giwunyaasaihi Autaaahaatiho japihi nanyamaitaise. Sandi nyami isihiya Judaahiya Isiraherihandi Yapihini nahandi Autaaahaatiho japihi numwaasitindi isihiya napopi animwaahipatombihiyai ahowimati numwaataahandamatetitaise.

¹⁶Iyataati ami isihiya biretihanidi tihwi jhi yeyetiwi namandipahohitihandi Autaaahaatihoai nunyawaawaahi biretihanidi sandi nahandi Autaaahaatihomihande. Iyati ami ipati wapaami

yandipiho ami tamirihiri Autaahaatihoai isihya nunyawaawaahi ami isititi saatitihoisangi nahandi Autaahaatihomihapaare. Isi siri kireti nyahi Judaahiyaanami asoya ipatami yandipiho tamirihiri isihya Autaahaatihoai jhi yeyetiwi nunyohipatomataiwihyaare.

¹⁷Ami ipati oripiti satami isititihomaipitihihoma Autaahaatiho nawetati yondaati ami oripi ainjihipatami isititihoma nawetati neti isimumwaanji yamanjitatetemati bihiwatosataise. Sahi isihyaati nyahi Judaahiyaanami dawaataati ipaahambihyaati sati ipati oripihati ainjihipatomataiwihyaate. Sahi saiwihyaatisi nyahi Judaahiyaanamihetapi Autaahaatihomi gaahaiwa noaipasiwaiwa nepi wani andititihomaitatamaninawaayopo. ¹⁸Isi ami Autaahaatiho ipi oripihatami ikwiri isititihomatiyati nawetati nyahi Judaahiyaanami isihyai neti ipaahaapema yotisawihyaapi sahi sisipihitiwi ami satiwi nyahi kiyai nusatipihayaayo tiwi windi gimunyaapise. Sahi saiwi windi nyahi Judaahiyaanami isihyai usopi gemaananiwise. Ami sahi Judaahiyaanami isihya Autaahaatiho ipaahaapemasawihyai mmopumapi genanawaawaahi kimandi sahi baiwi gwinyaapise, sahi ipatami tambatihiri tamirihiri waapoho nunyawandi anditihomawawaamaayopo. Owe. Nehi tamirihiri tanyaaha sahi isititi saatitihomatitangi waapoho nasanyati anditihomawataise. ¹⁹Ami sandapi sami usaati nyahi Judaahiyaanangi sanyatitaapo, ye sandi akitindaahandi kandi sahi Judaahiyaatangi ipati oripihati yamanjitatami isititi saatitihomatetahiyaatangi nasawetati yasotise nyahi sami ipaahaapi dawaataatapihiyaani ipi oripihati ainjihipatami isititi saatitihomatihomataiwihyaanangi neti sangi nawetati yasotimbipihihomataiwihyaanangi nyatiwi kanyatitaapo. ²⁰Sandihi akite kiyai Autaahaatiho gimaawunyaahohitihanda kiyai Autaahaatiho neti nasipati yondaise. Ami sahihi sami Autaahaatiho giwunyaahohitihanda Autaahaatiho neti kiyami aunahipati sangi nasanyataise. Nasamihihomataiwihyaanangi sahi sami giwunyaahohitihanda kapihi anditihomawataise. Isi sahi satiwi nyahi kiyami aunahipati nehaayono tiwi sahi windi genaniwi gimunyaapise. Namapi nehiiwai baiwi jatiniwise. ²¹Nisi isihya Judaahiya ipi oripi yamanjitatami ikwiri isititihomatihomataiwihyaanangi Autaahaatiho windi nehiiwai maawinjasi ami sangisangi windi ko nehiiwai maasinjaitaise.

²²Kimandi sahi nahatiyaati baiwi mmoniwise Autaahaatiho isihyai gaahaiwa kawisati iwatamasitihanduni topitaata ainjharisati tipitapaati usositihanduno. Maipihandi isihya kiyohiyihiyai topitaata ainjharisati tipitapaati usonati ami sangi gaahandi kasisati jatatamanataise. Sahi baiwi sandi Autaahaatiho sangi gaahandi kasisati jatatamasitindaatihomataiwihyaanangi kiyaatinihi bimaami nowaawaahi nga bimitaapo. O ami sahi saiwi windi kamaayawaawaahi sangisangi

Autahaathiho neti namandipasamaitaise. ²³ Ami nyahi Judaahiyaanami isihyaahi kiya japihi nepemaitiwi Kiraisihopi giwunyaasaihaahi Autahaathiho japihi numwaati namandipati nemasipipihi japihi neti bihiwausositaise ami saitandi ko watipihandisahoso. ²⁴ Sahi isihyaati nyahi Judaahiyaanami ipaahaapi dawaataatapihyaati ipi oripi ainjihipatami isititihomataiwihyaati windi sireti kaitaatiwihandi ahimotihandi nehi koai Autahaathiho nasawetati nesisati ipi oripi yamanjateteti bihiwasosihihyaate. Ahi nyahi judaahiyaanami isihya ipi oripi yamanjatamataiwihyaare. Isi ami nehi nanihiyati napaisaati nga Autahaathiho ipi oripi yamanjatetapi isititihomataiwihyaate. Koma nyahi ipaahaapi dawaataatapihyaati ipi oripi yamanjatetapi isititihomataiwihyaate. Koma nyahi ipaahaapi dawaataatapihyaati ipi oripi yamanjatetapi isititihomataiwihyaate.

Autahaathiho Isihya Nahatiyai Maariho Asipiwisataise

²⁵ Nisataiwi Kiraisihopi giwunyaahohiyihyaati nisi naisihyaate, wapa jihura noasandinjihapa wani ningi Autahaathiho neti nanisihahi sahi mmondaatiwi kasatitandiyoni baiwi atiwise. Nini kasatitandiyohitindi sangi yatihahi neti japatonihahi sahi satiwi, nyahi Autahaathiho giwunyaahohitihandi nesi kaitihaahira nga mmonaahiyaane tiwi dopi windi gemaananiataiwo. Iyataati kimandapito, nyahi Isiraherihyaanami isihya taahiyihya kiyaami omanjititihahi amitihahi nepi nawahaamataiwi watipimahohitindi apipaahandi kandinihi kiyawaamaayopo. Owetise. Sandi kiya saiwi kiyaami omanjititihahi nawahaamataiwi watipitimi nuwi isihya nahatiya yapipati nahandaahiya nyahi Isiraherihyaanami ipaahaapi dawaataatihya Autahaathihoenda Jisaasihonetapi napiwi gaamasaihihuraatitaise. Aisaihihura nyahi Isiraherihyaanami isihya japihi nepemaitiwi Jisaasihonetapi napitaapo. ²⁶ Aisaihi kimireti siyati Autahaathiho kiyai japihi numwaitaise. Koma nyahi ipaahaapi dawaataatapihyaati ipi oripi yamanjatetapi isititihomataiwihyaate. Koma nyahi ipaahaapi dawaataatapihyaati ipi oripi yamanjatetapi isititihomataiwihyaate.

“Isiraherihyai Japihi Numwaitandi Autahaathiho Ahiwisihomataiwi Jaiyanihandaahapi napitaise. Nasati Jekopihomataiwi manyinya saisatoyaami maipihandi apipaahi titihimetindihandi ko kiyaamihetapi apipaahi kandinihi nemaitaise. ²⁷ Nemahonihi koetapi sura nisi piwiha wisasati kiyai nini numwito. Nunyati kiyaami maipihandi nemwaito,” *Aisaiyaaho 59:20, 21*

tati Autahaathiho komi piwihaatihahi kandaase.

²⁸ Ami nyahi Judaahiyaanami isihya Jisaasihomataiwi piwiha gaaha atihomiwi nemawaawi kiya noaipapi Autahaathiho tiworisaimatawaayopo. Kiya komi tiworisaatohitindaahi Autahaathiho sahi ipaahambihyaatangi nasamaati jatatanataise. Siyataahandi kandi ami nyahi Judaahiyaanami asoya Abiraahamiho, Isaakiho ami Jekopihoai Autahaathiho komi piwiha wisasati numwindihandapimainjihahi Judaahiyaanami isihya Autahaathiho

tiworisaimatohiyihiyai Autaahaatiho maariho nunyataise. ²⁹Sandi apaapimahe, Autaahaatiho isihyaapi satati, siya isihya nisihyaatito tati usonati ahiwisati gaahaiwa kawitaano tati kawisati gwinyaasiwaiwa jahira neti namandipati nanipimatahomendaate. Ko katimbipa titihi kireti kiyahore. ³⁰Ami jihura sahi nyahi Judaahiyaanami dawaataati ipaahaapi bimohiyihyaati Autaahaatihomi piwiha atihomiwi nemapihiyaate. Nemapihiyaatitawaahandi kandi wani Autaahaatihomi maariho asipaindihandi sahi newaayopo ami Judaahiyaanami isihya Autaahaatihomi piwiha atihomiwi nemahohitihandaaho. ³¹Ami siri kireti sangi Autaahaatiho maariho asipisindindaahi Judaahiyaanami isihya Autaahaatihomi piwiha atihomiwi nemawaayopo Autaahaatiho samatiyati kiyaisangi maariho asipiwitando. ³²Ami sandi Autaahaatiho isihya nahatiyai neti komi piwiha atihomaawiwi nemahohitihandaatihi napuwataise kiya mmotinawaawi japihi nepemaitisaihi kiyai ko maariho asipiwitando tato.

Autaahaatihoai Nyahi Nuwimaitihaawo

³³Ese! Autaahaatiho isihyaani nahatiyaanangi nehi gaahandihini kanyisataise. Ese! Komi gwinyaasitihandi nesi kaitandihira mmositihanduni komi kahapaamapipa nahataapa osamati gwinyaasitihandi durihiri tongihiramatiyati apipaahi tongihande. Ko kahapaamapipa kaitandi sireti kaitaano tati gwinyaati kaiwaiwa nyahi apipaahi windi mmonaati newa namesapaito. Ese! Ko kahapaamapipa kairihiretisangi nyahi apipaahi windi mondo. ³⁴Iyataati sandapi Autaahaatihomi piwiha jipatipindisihatihapi wa satise

“Awaisiho amitiha gwinyaasirihireti nyami diyaamaho usonahore?

Iyati nyami diyaamaho Awaisihoai amitiha gwinyaitandihandi nunyahore? ³⁵Iyati nyami diyaamaho wapa Autaahaatihoai nunyahore, Autaahaatiho kapaami wihoaanjihapa numwisihoi japihi numwitando?”

Aisaiyaaho 40:13

Owe. Apipaahi owetise tati jipatipindise. ³⁶Sandi apaapimahe, kahapaamapipa nahataapa ko kiyati ahaihi ami koetapi maarisati ahoyati daayati bimoti ami koai neti mepi autaahemwaitandi nahataapa isihyaanangi maawi ahondaise. Isi ami nyahi Autaahaatihoai kometirihiretapi nyahi kiyaaninihi nasisoari mepi autaahewaumwaitihaawo. Akite. Siri kireti nyahi kaitihaawo.

Nyami Ambipati Nahatepi Katinihi Autaahaatihoai

Komi Otipapatapi Numwitahaawo

12 ¹Isi ami nisataiwi Jisaasihopi giwunyaahohiyihyaati nisi naisihyaate, Autaahaatiho nyangi pihitahaiwaara komi maariho asipinyindihandapi nisi maariho nahatoaisati sangi piwiha watipiha nini

sasataato, sahi ninaasonji ninaasaanji sami ambipati asipati nahatepi katinih
 Autaahaatihoai komi otipipatapi koai maariho apipaahi nga usaawimatahandi
 nunyawise. Aiwi sandi sami maariho omarjititihapi kaiwise. ²Aiwi sahi
 isihya maapi yapimbatambihya kahapaamapipa kaiwi daiwi bimohirihireti
 windi nepi kamaiwise. Sahi Autaahaatihoai nehi iwinjasaihi ko sami
 maariho omarjititih neti nasepemailhaati asohoemati ami sami amitih
 gwinyaahohitihandi neti asitihandemati nasanyane. Ami sahi sandi siyawaawi
 apipaahi gaahapa Autaahaatiho maaritati gwinyaasirihireti gaatati koai
 apipaahi usaawinati ami titihitirihiretihapa sahi mmoniwi kaitaatiwo.

³Ami Autaahaatiho nehi sawaho nini sangi Kandisasitandi ahinihohoninisi
 sahi nahatiyaati naasonji naasaamaangi sasataato, sahi sawanaatapi satiwi,
 nyahi usaisi nusatipihaawaati jiji autaahi wanaataapitihayo tiwi windi
 gimunyaapise, sahi windi akiti sametawaahando. Windi samaiwi sami
 amitih gwinyaahohitihandi yatih ipatisaniwi sahi ninaasonji ninaasaanji
 Autaahaatiho kopi giwunyaitaatiwihandi awitati kamwaanji nasamimumwaanji
 nepi sawanaati tipitapaapi mmotiniwise. ⁴Sahi mmoniwihiyaate isihyaanami
 ambipati naasaipih katami wihoaanji wihoaanjihapa ikwauhiri wapa wapa
 taahipipaisahate. Iyati sati ambitami ikwauhiri wapa wapa ahetimbipaami
 otipipati nehi kati witi wite. Naasaipitimahe. ⁵Ami siri kireti nyahi
 Jisaasihopi giwunyaahohiyihyaani isihyaanini taahiyihyaaninitihahandi
 Kiraisihoaisaati timaamaitohitihanda noaipawa ambipati naasaipatamatiyaati
 nehi naasiyaanitaati timaamaitihaayo. ⁶Isi Autaahaatiho sawahometirihiretapi
 ninaasoninini ninaasaanangi otipipati kahati kahati kaitihaahandi
 watipihandi nanyinyati sawaho nyangi neti anditinyaisirihireti nesi
 kaitihaawo. Ami Autaahaatihomi Itipih nyami usaanangi Autaahaatihomi
 piwiha atisaati newaati kopi nyahi awusaitihaahati otipipati nanyinyonaahi
 biyaati nga Autaahaatihopi giwunyaitihaahandi newaati isiwatohirihireti
 nesi ausaimanaati awusaitihaawo. ⁷Ami nyami isihyai ikwiri nunyaati
 iwitatamanitihahandi nanyinyonaahi sandi nga biyaati nyahi
 kaitihaawo. Ami nyami usaanangisi Autaahaatihomi piwiha isihyai
 katawaunjitihahanditanaahi ami sandi kandi nga biyaati nyahi kaitihaawo.
⁸Ami nyami usaanangi isihyaisi anditiwitihaahandi Autaahaatiho komi
 Itipihora nanyinyonaahi ami nyahi nga biyaati isihyai anditiwitihaawo.
 Utaaho wo wapa wapa isihyai nunyahondaataahi ko nga biyaati apipaahi
 iparihoematati kiyane. Utaaho woai isihyai iwinjatitandihandi Autaahaatiho
 nunyonaahi so sandi biyaati nga jatane. Utaaho wo isihyai maariho
 asipiwisataataahi biyati maaritati sisa aunihiyati sandi so kiyane.

**Sami Naisihya Jisaasihopi Giwunyaahohiyihiyaisuni
 Isihya Mambihiyaisuni Sahi Maariho Numwitaatiwe**

⁹Sahi isihyai maariho nunyahaayo tiwi otaatapihandi windi
 kamaiwise. Nehi apipaahi akiti akitinini sahi isihyai maariho

nunyawise. Aiwi wapa apipaahi ainjotati titihimetihapai sahi ahosumwapi nehi gaahapaisaahihi sami omanjititih nepi wisasawi kipiwise. ¹⁰ Aiwi sahi Kiraisihopi giwunyaapi komihyaatimatawawo noaipapi naisihyaatimatawawowoi maariho apipaahi baiwi naminiwise. Aiwi wonji wonji wo wopi sami omanjititih satiwi ko ningi nanitipihaaati gaahosi nini komi ambipati awaindemwati mepi autahemwaitaano tiwi maariho jandone. ¹¹ Sami maariho jandoti sisihaapihi waapohomatiyati natatutisiho sahi windi nepi bimwaapi nehi kiyaatinihi Awaisihomi otipipati maariho nahato nunyawimapi kiyaatinihi kawimi nuwise. ¹² Autaahaatiho Kiraisihoetapi gaahaiwa nasamitandi jatohitindaahi sami omanjititih sahi sisiwi aunihaiwi maaritiwise. Aiwi isihya sangi wapa mimaipisiwi naanjhaiwa nasamisaihi sami jatohitihandi namaamapi nehi kiyaatinihi anditititwi jaawi bitopi ami nasisoaari kiyaatinihi Autaahaatiho anditisiwitandi sahi gaapundawaatiwise. ¹³ Jisaasihopi giwunyaahohiyihya sami naisihya sinaanisa sinaapwisa jaatisa sunyihoya wapa ikipipa nandapa owetanihiyai samihapa wapa kiyai sahi nunyawise. Aiwi isihya sahi windi mausopi kiyai usa jainjasaihihiyai numwaapi sami añaanji niwupi nandapa yainjaraawiwise.

¹⁴ Aiwi isihya sahi Jisaasihopi giwunyaahohiyihyaatangi mimaipisiwi naanjhaiwa nasanyohiyihyai Autaahaatiho gaahandi kawisati iwitatamanita gaapundiwise. Aiwi kiyai Autaahaatiho mimaipiwisati neti nusopisasitandi sahi windi gaapundiwi kamundiwise. ¹⁵ Aiwi isihya usa nga maaritisaihihiyaisawi maaritiwi ami maariho tundonihi gwisaihihiyaisawi maasi gwiwise. ¹⁶ Sahi windi satiwi nyahi amitiha gwinyaitihaahandisahiyaani awaisawihyaanine tiwi sahi sawanaatapi gimunyaapise. Windi samaiwi ami otipipati yatih maipi maipihapa isihya mmoniwi nemasaihihapa nepi kaiwise. Aiwi isihya nahatiyaisawi naasairireti mmotiniwise.

¹⁷ Ami utaaho wo sangi wapa titihimetati maipihapa kasisonaahi koai wihoaanji titihimetati maipihapa sahi windi namunjawise. Nehi wapa isihya nahatiya gaahape tiwi mmoniwi gwinyaahohipipaahihi koai sahi kawiwise. ¹⁸ Isihya sangi itihisatiwi mimaipisisaihisangi sahi kiyai wihoaanji nepi itihundiwi mimaipimaawiwu namapi bipi napaisaati isihya nahatiyaisawi bimaawise. ¹⁹ Nisi naisihyaati Jisaasihopi giwunyaahohiyihyaate, isihya mimaipisisaihi kiyai wihoaanjihandi namunyawise. Namapi nehi kiyai iwinjasaihi Autaahaatihomihandisi kawitandaahi kawito. Ami sandapi Autaahaatihomi piwiha jipatipindisihaatihapi wa satati wihoaanjihandi nisihande nini isihya sangi mimaipisisohiyihyai wihoaanjihandi numwito tati Awaisiho katiso. ²⁰ Isi namapi Autaahaatihomi piwiha satati ami kinyi tiworihoai jaumwahonaahi nandapa nunye. Waapohopi komi naahwitarihiri awaurisonaahi nunye. Kinyi kinyi tiworihoai sawisapaapi komi

nihooatipati mitihaatihi mawitandihandi kinyi wirapusositaapo. ²¹Aimbi kinyi titihimetati maipihapai nehi iwinjasamihi neti tihiwati windi maahipatisane. Gaahapa kaimbi titihimetahapai kinyi nepi tipi ipihatime.

**Isihiya Watipihandi Nepi Awaisawihiyaimatiwi
Nyainjatohiyihyaami Otitihi Saanutahaawo**

13 ¹Isihiyaanini nahatiyaani naasoninihi naasaaninihi isihiya watipihandi nepi awaisawihiyaimatiwi nyangi nyainjatohiyihyaami otitihi saanutahaawo ami kiya nehihandi noaipapihyaametiso. Autaahaatiho sawaho katati isihiyai iwinjatitaatiwi ahiwihihyaaso. ²Isi ami utaaho itapaati wowaati isihiya awaisawihiya jainjatohiyihyaami piwiha atihomisati nematataahi Autaahaatihomi piwiha atihomisati nemataise. Isi sosaati Autaahaatihomi piwiha awaisawihiya japepihiriwi yaawati naanighandi wihoaanighandi numwitaapo. ³Ami awaisawihiya nyainjatohiyihyaapi isihiyaani usaanini gaahandi kiyohiyihyaanini windi yaitihaahiyaamaahe. Owe. Nehi isihiya usa maipihandi ami titihimetihandi kiyohiyihyaahihi kiyaapi yaitaatiwihyaare. Ami nyahi awaisawihiya watipihandisawi nyainjatohiyihyaapi windi yamaitihaawaahi ami nyahi gaahandi kaitihaawo. Saisaihi kiya nyangi nyasopi mepi autaahepinyamaito. ⁴Ami siya komi otipipatihyai Autaahaatiho ahiwihihyaare. Kiya nyainjatisaihi nyahi nga bimitihaawo. Isi nyahi titihimetihandi kiyahaawaahi kiyaapi yaitihaawo ami titihimetindihandi kiyohitihandapi wihoaanighandi nanyamitaatiwi watipihandi akitihandisawihyaaso. Kiya Autaahaatihomi otipipatihyaasi isihiyaani titihimetihandi kiyohitihandapi Autaahaatihoai apowihwi wihoaanighandi nanyamitandi gwinyaasitihandi kiya nesi kopi kawisawaayopo. ⁵Ami sandapi isihiya nyangi nyainjatohiyihyai biyaati atiwisaati kiyaami asimwaatitihwi nyahi saanutahaawo Autaahaatihoai apowindihandi nyahi namaitihaawuni nyami maariho sanyatati sandi nga titihisi sahi kaiwise nyatindihandapuno.

⁶Ami sandi kandapi isihiya awaisawihiyaimatiwi nyainjatohiyihyai nawiho kiya iwitatamanitandihwi nunyihyaayo ami kiya kiyaami otipipati nga kiyawaawi Autaahaatihomi otipipati taawi kawisawaahiyaatiho. ⁷Isihiya nyangi nyainjatohiyihyai kahapaamapipa kawitihawaawi otipipatisahiyaane. Isi ami kiya nawiho otipipatapihwi takisihandapinyatisaihihiyai ko numwitahaawo. Iyaati ikipipa anjaani yapipatapi nawihopi nyainjatohiyihya gaatisaihihiyai ko numwitahaawo. Iyaati kiyaisi newa autaahi niwimaawa usondihaawo. Iyaati kiyaisi nyahi mepi autaahewaamaitihaawo. ⁸Isihiya usaamihapa wapa nawiho ipoti numwitahaawo tiwi nehihandi sahi namusepise. Nawiho titihi kuraanihi nunyawwi wapa naitaatiwihapa nepise.

Aiwi sahi Kiraisihopi giwunyaahohiyihyaati maariho naminiwi isihya nahatiyai maariho nunyawise. Utaaho wo isihya nahatiyai maariho nunyataaho so Autaahaatiho winihapipa Mosesihoai numwimbipa nga japepahirataise. ⁹Winihapipa satimbipaaro kinyi asihya usihya usaamihyaisapi kamaime, isihyai timaamape, isihya usaamihapaapi kinyi kinyi maariho windi maahindone tati katimbipaaro. Saiwauni ami wapaisangi neti winihapipa nahataapai naasaahemati ahoyati nehi winihapipa naasaimbaahi noaipati satati kinyi isihya nahatiyai maariho nunye kiwahonji maariho naminihingipatamataimbo tati ahondaise. ¹⁰Utaaho wo isihya nahatiyai maariho nunyataaho kiyaisi windi maipihandi kamaawitaise. Isi utaaho isihya nahatiyai maariho numwiso so Autaahaatiho Mosesihoai Winihapipa numwimbipa nahataapa japepahirataise.

Nyahi Sisiheti Titih Jatinaati Daitihaawo

¹¹Saiwa sahi kaiwise satohitindi nini sangi apaapimaasato nyahi nyami maanimaanisaati Jisaasiho napitandihuraapi minjataati naapipa nanosohipapaatihapi nyahi nepaitihaahuratihisato. Ami sandi sahi mmonawaayopo. Nyahi wuwaninihi yeyetaati Kiraisihopi giwunyaapi nasonihi nyangi Autaahaatiho apipaahi kiyaanangisinihi Jisaasihoetapi nanyamaitandihura asisiha neti detemapi napinjati aimi kima nasati detindaise. ¹²Asahatindihandi aimi owetitandi detindaati ami asisiha aimi bowitandi neti timaninjipamatiyati maapi kimura maipihandi ahotimi naindihandi aimi owetitandi detitati ami Jisaasiho jahira maapi napitandihura aimi detindaise. Isi isihya maipihaiwa asahatinditih noatiwi kiyohiwaiwa kamaayaati namawaati ami gaahaiwa otapihaati ipihoeti isihya tunniwi yahwindaatiwihiya pwisipi yaipa nepi isipi wirapi nipaatiwi timesohipamatiyaati nyahi newaati isiwaati kiyaati jaawa timetitahaawo. ¹³Nyahi biyaati titih isihya otapihaati titih daayohipamatiyaati daitihaawo. Waapoho watipih isihya naniwi naharitaatiwiho nyahi windi nanaati naharisaati konyahimaataati ami titihimetati gimunyaatihapa kamaayaati asihya usihya usa kihya kihyaisaati timaamaitaati kamaayaati ami isihya usaisaati tunaati itihinnaati manditimindihaawo. ¹⁴Saiwa nyahi windi kamaayaati namawaati nyami Awaisiho Jisasi Kiraisiho nyami pwisipi yaipihosi koai nyahi newaati nyamihetewaamaati gwisititahaawo. Iyaati nyahi koai newaati isiwatitahaawo. Iyaati ambipati maariho jahiho kanyatih maariho kaiwaapi nyandosiwaiwa windi atisaati kaitihaawihandapi mitaahi gimunyaitihaawo.

Nyami Naisihya Kiraisihopi Giwunyaahohiyihya Wapa Kiyohipipa Nyahi Windi Tipitapaawaati Mausondihaawo

14 ¹Ishihya Kiraisihopi kiyaami giwunyaahohitihandi noaipati sangi watipitahiya Jisaasihomi isihyaatamihatih napisaihi sahi

napaitiwi maaritiwi kiyai numwaapise. Aiwi kiya kiyaami Kiraisihopi giwunyaahohitihandi sangi watipitihahi kahapaamapipaapi wipaiwi gwinyaapi kiyohitihandi sami omanjititihapi mimaipaiwunyaapi piwiha tunati yahwiniha windi kamaniwise. ²Isihiya usa kiyaami Kiraisihopi giwunyaahohitihandi aimi watipitisawihiya satiwi gaasi kahapaamapipa nahataapa nanihiyaati nandaano tiwi nanawaayopo. Iyauhi ami isihiya usa kiyaami Kiraisihopi giwunyaahohitihandi sangi watipitisawihiya satiwi kohasipihohi maasapihohi gwititihohi nyahi windi namaanaati nehi noapi ahosihaahi nandaano tiwi nehi noapi ahosihaahi nanawaayopo. ³Isihiya nandapa kahatamatipetihapa nanihaiwi nanihohiyihiya isihiya usa kohasipihohi maasapihohi gwititihohi namaanihohiyihiyaapi mimaipaiwi gimaawunyaapise. Aiwi isihiya kohasipihohi maasapihohi gwititihohi windi namaanihohiyihiya isihiya nandapa kahatamatipetihapa nanihaiwi nanihohiyihiyaapi satiwi kiya nanihaiwi nandapa kahatamatipetihapa nanihohitimandi maipihandi kiyawaayopo tiwi windi gwinyaapi kamaatiwise. Ami Autaahaatiho Jisaasihoetapi komi manyinyaatimatitaatiwi isihyaati nandapa nahataapa nanihohiyihiyaatisuni nehi noapi ahosihaahi nanihohiyihiyaatisuni ahoyati aimi nasamaataise. ⁴Utaaho wo womi otipipatihohi wapa kaimbipa sahi nepi sami omanjititihahi mimaipaiwunyaapi tipitapaapi usondaatiwi sandi samihandimaahe. Sandi nehi komi awaisihohimihande. Nehi kohihi komi otipipatihohi nga titihahi kaiso e mimaipiyati kaiso tati neti tipitapaati usondaise. Isi ami Autaahaatihohi isihiyai sahi nepi tipitapaapi usondaatiwi sandi samihandimaahe, nehi ko sawaho Autaahaatihohimihande. Awaisihohi Jisaasiho komi isihiyai nga anditiwihonihahi kiyaami kopi giwunyaahohitihandi noaipati watipitonihahi nga bitoaitaapo.

⁵Isihiya usa asisiha wa naasaapi saiwi gwinyaapi satawaatopo, asisiha kima nyami apipaahi awaisiha usipipaapi anaahihe tiwi kai nepi awaindahomihahi anaahihemawaayopo. Iyauhi ami isihiya usaamitohitihandi satiwi gwinyaawaayopo, ami nyapaahi asisiha wa wa wipimetati nahata nehi nauratetihahiwe, tiwi gwinyaapi, kireti kahapaamapipa kiyawaayopo. Isi sandapi sahi ninaasonjihahi kinyi amitihahi maariho titihemapi nesipatiwi gwinyaapi kireti kaiwi japepihiriwise. ⁶Isihiya waapi satiwi kima asisiha apipaahi awaisiha anaahihahaasi nyahi awaindahomihahi anaahihewaamaitihahaawo tiwi kiyohiyihiya siya Awaisihopi giwunyaapi koai nepi mepi autaahepumwaitaatiwi sandi kiya kiyawaayopo. Aiwi isihiya usa nandapa wapa wapa nahataapa nanihaiwi nanihohiyihiya siya Awaisihopi giwunyaapi koai mepi autaahepumapi sandi kaiwi ami nandapaapi Autaahaatihohi gaahohi gaare undawaatopo. Ami isihiya usa nandapa wapa wapaapi yaiwi namaanihohiyihiyaisangi Awaisihopi giwunyaapi koai mepi autaahepumapi sandi kaiwi ami

nandapa wapa kiya nepi nanihohipipaapi Autaahaatihoai gaahorje gaare undawaatopo. 7Iyaatai nyahi naasoninihi naasaaninihi nehi niwahonini niwihaanisapi asiyihiyaanini bindihaamaayo. Iyaati naasonini naasaanini niwahonini niwihaanisapi siyihyaanini napohaamaayo. ⁸Ami nyahi naasonini naasaanini asiyihyaanini namaapowaati bindihaawaahi Awaisiho Kiraisihoai newaati mepi autahewaumwaati komi omanjititihisi usaawitihawwi bindihaayo. Iyaati ami nyahi naasonini naasaanini napohaawisangi Awaisiho Kiraisihoapihisi niyaati koai newaati mepi autahewaumwaati komi maariho newaati usaawitihawwi napowaati koenda niyahaayo. Isi ami nyahi asiyihyaani bimowaati ami napowaati koenda niyahaawisangi Awaisiho koai newaati mepi autahewaumasaihi usaawindandi bimowa napohaayo.

⁹Sandi kandi nyahi nehi kopaahihisi bimowa napwitihaahandapi Kiraisiho napoti japihi nepataise ami siyati isihyaani asiyihyaanamuni napohiyihyaanamuni ahoyati Awaisihoematati nanyamaati nyainjatitando. ¹⁰Isi ami sahi usaati sami naisihya sangisawi Jisaasihopi giwunyaahohiyihiyai apipaahi windi nepi tipitapaapi mausowise. Aiwi ami sami usaati isihya samataiwi Kiraisihopi giwunyaahohiyihiyai mimaipaiwi mausowise. Ami nyahi nahatiyaani Autaahaatihomi ndimaahomwaaaji noaipasaihi ko neti tipitapaati nyasondandihyaaniso. ¹¹Ami Autaahaatihomi piwiha jipatipindisihatihapi wa Awaisiho sandaase, “Nini asohonini nasisoaari bimohihonini piwiha kima akitinisi akaaha kandaato isihya nahatiya nisapi atotipiwesawi nisi otitihisi pinutaapo. Pinuwi satitaapo, ‘Ese! Autaahaatiho kimo akitihore,’ tiwi mepi autahepinimaitaapo,” *Aisaiyaaho 45:23* tati jipatipindise. ¹²Isi ami siyaati nyahi naasonini naasaanini kahapaamapipaapi siyaati siyaati kiyahaayo undaati nesipawaati Autaahaatihoai kaundito.

Naisihya Kiraisihopi Giwunyaahohiyihya Napepaitatiwihaiwa Nyahi Kamaitihaawo

¹³Isi ami nyahi Kiraisihopi giwunyaahohiyihyaanini windi newaati tipitapaatinaati motindihawo. Motinaati namawaati kimireti gwinyaitihaawo. Sataato: nyahi ninaasonini nyami naisihya Kiraisihopi giwunyaahohiyihya wapa kapetapi napepaapi maipihandi kiya kaitatiwihaiwa windi kamaitihaawo. ¹⁴Nini Jisaasihoisati maasi timaamaititi bitohotihandaahi Jisaasiho neti ningi nanisihisi nini saindi mmonataayo, wapa kahapaamapipa nehi sawihandi noipati isihya namaaniwi onaitatiwi onaahapaimatataamaise. Owetise. Nehi isihya sawana kahapaamapipa wapaapi satiwi sapa kahapaamapipa nyahi nandihawwi itihapipa ahotati onaahapaasi nyahi windi newaati namandihawo tiwi kiyaami amitiheti omanjititihisi gwinyaasaihhipa

sapaahi kireti kiyaapi onaahapandaise. ¹⁵ Ami nandapa wapa wapa sahi nanihohitihanda sami naisihiya Kiraisihopi giwunyaahohiyihiya usaami maariho nepi nusopisasiwi yaawihandi nunyawaawaahi sahi kiyai sami maariho windi apipaahi namunyawaayopo. Isihiya Kiraisiho maariho nunyataati japihi numwaitandi kiyaapi napwisawihiyai sahi sami nandapa nanihohitihanda kiya napopi Autaahaatihoai windi mausopi owetitaatiwihira daihira maipihandaatihi sahi windi numwaasi namuwise. Apipaahi owetane. ¹⁶ Isi ami sahi nehi nanihaiwi nandapa kahatamatipetihapa nanihohitihandi gaahandiso tiwi sahi gwinyaapi kiyawaayopo. Sahi siyawaahandi kandi ami isihiya usa sahi sandi kiyohitindapi satiwi sandi gaahandimahe tiwi gwinyaapi katisaihaahi kiya piwiha mimaipitiwiha sami gaasindapi windi kamaatita sahi baiwi jatiniwi bitosawise. ¹⁷ Sandi nini sangisi apaapimaasato, Autaahaatiho komi isihiyai iwinjatindihandi nandapa ami waapoho isihiya maaritohipipa kiyaami maaritohirihireti nepi nanihohitihandimahe. Owetise. Ami nehi kandi winde. Autaahaatiho komi Itipihora nyahi titihi daayaati bitowaati bimaawa ami napaisaati tunaati yahomunaati bimaawaati ami nyami omanjititihisi isaati aunihyaati maarititihawihandi katanyisati nanyasindihande. Nehi saiwaamihaiwaahihi Autaahaatiho komi isihiyai iwinjatimbipihisi ahondaise. ¹⁸ Isi ami isihiya sandi nepi isipi Kiraisihomi otipipati kawisohiyihiya Autaahaatihomi maariho nepi usaawiwitaapo. Aisaihi ami kiyai isihiya usoniwi saunditaapo sahi isihyaati gaahyaatisi gaahandi kiyawaayopo undiwi usondaapo.

¹⁹ Isi ami nyahi wapa napaisaati itihapipaara tunaati yahomunaati bimitihaahandi nanyinyati ami nyangi Jisaasiho giwunyaahohiyihiya usaisati maasi ahoyati nyatatamanati anditinyaiwitandihaiw aapaahaitihaawo. ²⁰ Sahi satiwi gaasi nandapa sapa sapa nini nandaano tiwi nanihohitihanda Autaahaatiho komi isihyaamiheti kaiwaiwa sahi windi nepi namopisasiwise. Ami nandapa nahataapa nga isihiya nandaatiwihape. Nandaatiwihapandaahandi kandi isihiya Kiraisihopi giwunyaahohiyihiyai sahi wapa nopisasiwi nanihohitihanda maipihandaatemahonaahi sahi wapa nopisasiwi nandaatiwi sandi titihimahe. Owetise. ²¹ Sami naisihiya samataiwi Kiraisihopi giwunyaahohiyihiyai neti nusopisasonihi maipihandaatihi timihaitaatiwihapa nandapaisangi waapoho wainihandisangi ami wapa wapaisangi sahi windi namandaatiwi sandi titihe.

²² Isi sahi nandapa ami maahoapatami gwititihopuni waapoho wainihandi nanihaiwi nandaatiwihandapi gwinyaapi nehohipipa nehi sawanaatamihetuni Autaahaatihomihetuni sapihi ahotane. Ami sahi satiwi gwinyaapi nyahi kimba nandapa gwititihopuni waapoho wainihandi nanihohipimba gaahandi kiyahaayono tiwi maariho naasohitanihi

kiyawaawaahi ami sami maariho windi yaasati naanamaasisonihi gaasi sahi maaritiwise. ²³Ami sahi sami nanihohiwaiwaapi maariho yiyatiwunyaawaawaahi kapa sahi nainjaihihura Autaahaatiho piwiha neti samiheti yasutaati sasatitaise, sahi maipihandi kiyawaayopo satitaise, ami sandi sahi sami maariho kasatihi gwinyaahohirihireti sahi gwinyaapi kiyawaamaayowo. Isi ami wapa sahi Kiraisihopi giwunyaahohitihandi kasatirihireti kamaayawaawaahi sandi sahi maipihandi kiyawaayopo.

Kiraisihomi Dahopeti Nyahi Daayaati Isihya Usai Newa Usaawitahaawo

15 ¹Nyahi nyami Kiraisihopi giwunyaahohitihandi watipitisawihyaani nyami usa kiyaami kopi giwunyaahohitihandi sangi watipitisawihiyai ikwiri nunyaati niwimaawaati iwitatamanaati anditiwitihaawo. Iyaati nehi nyahi yawanaaninihi newaati maariho witaati usaimaamanindihaawo. ²Yawanaani sandi saminaati namawaati nyahi ninaasonini nyami naisihya Kiraisihopi nyamataiwi giwunyaahohiyihiyai kiya kopi giwunyaahohitihandi awaindewaumawaati anditiwitihaawi gaahandi kiyaami maariho omanjitihi usaawinihandi kawitihaawo. ³Ami Kiraisiho ko sawahoai maariho wiwitati usaawindandihandi windi kamaise. Autaahaatihomi piwiha satati jipatipindirihireti kiyataise. Iyataati piwiha wa satise:

“Autaahaatihonye, piwiha kinyetirihiretapi gi nepi nangopisasiwi mimaihiwi isihya katohiwaiwa nisi ambipateti timahiyati yanimwaataise,”

Aunihihiri 69:9

undataase tati jipatipindise. ⁴Ami piwiha nahata jihura jipatipindimbipa nyangi katanyisitandi ahondaise. Katanyisati anditinyaihonihi nyahi kapetapi kiyaaninihi andititaati Jisaasihomihetapi Autaahaatiho apipaahi kiyaanangisinihi nanyamaitandihuraapi jatitihaawo.

⁵Ami Autaahaatiho nyahi kiyaaninihi Kiraisihopi giwunyaitihaahanduni anditititihaahanduni nanyamisiho sangi anditisaihonihi amitiha maariho nehi nauratihaiwi gwinyaapi Jisaasihomi itipati naitaatiwi sapi nini koai piwaunditi gaapundataayo.

⁶Saiwi ami sahi ahoyaniwi maahomwaanji nehi naasaimwaanjihi nepi Autaahaatiho nyami Awaisiho Jisasi Kirasihomi Sapihoai mepi autaahepumwaitaatiwo.

Isihyaani Judaahiyaanangisuni Isihya Nyami Dawaataatapihiyaisuni Kiraisiho Nyatatamanataise

⁷Sahi Kiraisihopi giwunyaahohiyihiyaati sami omanjitihi maaritiwi napaitiwi isihya Kiraisihopi giwunyaahohiyihiyai Kiraisiho nyangi nanyamaasipatamataiwi numwaapise isihya Autaahaatihoai mepi autaahepwaito. ⁸Sandi nini kimireti sandaato, Isihiyai Japihi Numwaitandi

Autaaahaatiho Ahiwisiho Kiraisihotohiho Judaahiyaanangi nanyamaati nyatatamanitandi nasataise. Iyati ami Autaaahaatiho kahapaamapipa nyangi kanyisati nanyamitandi jiji timanati katiwaiwa akiti kireti nga kasitaise tati nyangi ko neti nanyisitando. Iyati ami sireti nyami asoyai kahapaamapipa saindi kasito undati jiji timanati Autaaahaatiho kaundiwaiwa ko neti akiwaiwemaitando. ⁹Iyati ami isihya Judaahiyaanami ipaahaapi dawaataatapihiyai ko numwaati iwitatamanati anditiwihonihi Autaaahaatiho maariho asipiwindihandapi kiya koai mepi autaahepumwaitaatiwo. Ami siyati Autaaahaatihomi piwiha wa jipatipindisiha satise:

“Isihya nyahi Judaahiyaani kinyi isihyaanami ipaahaapi dawaataatihyaamihatihi kiyai nini kinyapi saunditi, ‘Autaaahaatiho apipaahi gaahore,’ unditi gisi nini gaare hitito. Saindi ami aunihihiri kinyapi aunihindi kiraahi gisi nini mepi autaahehimaito,” *Aunihihiri 18:49*

undipatamatiyato.

¹⁰Iyati jihaati satise,

“Isihyaati ipaahaapi dawaataatihyaati Autaaahaatihomi isihyaisawi maasi sami omanjititihii maariwi sisiwi aunihaiwise,” *Winihapipa 32:43*

tati wa ahotise.

¹¹Iyati ami waisangi jihaati sandaase.

“Isi ipaahaapi dawaataatihyaati nahatiyaati Awaisihoai nepi mepi autaahepumapise. Isi nahatiyaati koai mepi autaahepumapise,”

Aunihihiri 117:1

tati ahotise.

¹²Iyati ami jihaati Aisaiyaaho satise:

“Utaaho wo komi ambipati Jesihoetapi namoyaatimi nasohiyihyaamiho noaipaitaise. Noaipati ko isihya ipaahaapi dawaataatapihiyai iwinjatitaise. Iyonihi kiya kopi giwunyaapi satiwi ko nyangi nanyamaati neti nyatatamanito tiwi giwunyaapi jatitaapo,” *Aisaiyaaho 11:10*

tati Aisaiyaaho kandaase.

¹³Autaaahaatiho nyahi kopi giwunyaahohitihandamuni ko japihi apipaahi kiyaanangisinihi nanyamaitandi nyahi jatohitihandamuni tanyaahopi nini sapi gaapundataayo. Gaapundataayo sangi sami omanjititihii sisiwihaunihaitaatiwihanduni napaindihanduni sahi kopi giwunyaahohitihandetapi sami maarihoaatihi tisahiwati wisaiwito. Wisaihonihi komi Itipihomi watipihandi sangi anditisaihonihi sahi kiyaatangisinihi apipaahi ko nasamaitandi sahi jatohitihandi waati awaindi noaipapi nuto.

Poriho Komi Otikipatapi Jipatipiyataise

¹⁴Nisi naisihyaati nisataiwi Kiraisihopi giwunyaahohiyihyaate, sapi nini niwahonini sandi mmonataayo, sahi sawanaati nepi itatamaniniwi

titiematitaatiwi gaahanduni amitha gwinyaitaatiwihanduni kiya nepi tisaindahiyaare ndi gwinyaataayo. ¹⁵Piwiha wiwa sahi gwinyaitaatiwi nini kasatiti kimandi utipimandaatihi sapi nini jipatipiyohiwiwa apipaahi watipiha jipatipiyataayo. Nini sapi nehi nanihaindi saiwa jipatipiyohitindi ami Autaahaatiho ningi komi otipipati kawitandi nanimihe, isihya Judaahiyaanami dawaataatihiyaamihatiho. ¹⁶Siyati isihya nyahi Judaahiyaanami ipaahaapi dawaataatihiyai iwitatamanitandi Kiraisi Jisaasihomi otipipati naninyati Autaahaatiho ningi ahinihonine. Soninisi utaaho isihyaamuni Autaahaatihomuni otihapipi bitosihomataindihonine. Iyataati Kiraisiho Autaahaatihooapihapi nasati otipipati maapi katati kaiwaiwaapi piwiha nini neti ausaataayo. Saisanihi Itipihopi piwiha kaaraahi isihya ipaahaapi dawaataatihiyai yatih neti Autaahaatihomihiyemahonih nini kiyai neti Autaahaatihoi kiyaapi maariho usaawinati wiwihandani komi otipipatapahih numwitando.

¹⁷Isi ami nini Kiraisi Jisaasihoisati maasi timaamaititi ko anditinisih Autaahaatihomi otipipati kawisohitihandapi tihaapindi nga genananito. ¹⁸Aindi nehi nini nuwahonishetapi kahapaamapipa isihya nyahi Judaahiyaanami ipaahaapi dawaataatihiya Autaahaatihomi piwiha atiwiwi komi otitih pinutaatiwi Kiraisiho kahapaamapipa kaiwaiwaapaahih nini katito. Aindi kiyaisi nini Autaahaatihooenda numwaasi notaati nisi piwiharaahuni kahapaamapipa kiyohiwaiwaraahuni Kiraisiho kaiwaiwaapaahih nini katito. ¹⁹Iyataati saiwa piwiha nini piwandi kahapaamapipa kiyohiwiwa ninimaah. Owetise. Nisi piwiha piwandi ausaati kiyohipipa Autaahaatihomi Itipihopi neti kahapaamapipa watipihaiwa kiyati isihiyai siwipati watipihaiwa nisihetapi neti nunjataise. Aih Jerusaremihandaahapi namasati Kiraisihomi piwiha ko kaiwaiwaapiha nahata ausaati nesiwesiti gaamati nini kaimi nundi Iririkamihandami deti yapipataahimataayo. ²⁰Iyataati isihya Kiraisihopi sangi atihomiwi kopi giwunyaapi ambipati nepi sangi mepi autahemwahohiyihyaamihatihi Autaahaatihomi piwiha Kiraisiho kaiwaiwaapiha ausaitandi nini nisi maariho nunyati pihindi gwinyaataayo, saindi kiyataati isihya usa Kiraisihopi piwiha aimi ausaasaihahapihi jihaati nini windi kamaitando. ²¹Iyataati nini sandi kiyohitindi Autaahaatihomi piwiha wa aimi timanati jipatipindisiha nini neti japepihiriti kai akaahemataayo. Iyataati piwa sa satati jipatipindataise:

“Isihya Kiraisihopi kiyai usa kamundauhi atihomiwi
monihohiyihya atiw mmondaapo,”

Aisaiyaaho 52:15

tati jipatipindise

²²Iyataati saindi isihya Kiraisihopi sangi atisohiyihyaamihatihi ko Kiraisiho kaiwaiwaapiha piwiha ausaatoandaati otipipati kati asisiha taahiwaiwara neti nanisapusih nini sangisenda windi namaaso.

²³Ami wani otipipati sati nini yapipati aunahipa isihya kimiyaamimatihia aimi kaindi owemataayo. Owemataayoni kinaungwiha taahiwaiweti nini napiti sangi jasondondi gwinyaambithonine. ²⁴Isi wani napiti jasondandi taati jatinataayo. Yapipati aunahipa Sipenihandaahapi notaati nini sangi Romihanda jainjaitandi gwinyaataayo. Nini napiti Romihanda sangi masiwonji jainjasanihi sahi ningi anditinipi daihiraapihapi wapa naninyawi kaitaatiwi jainjaitande. ²⁵Saindi daimi napitandihonini konini wani nawiho ami wapa Kiraisihopi giwunyaahohiyihya Jerusaremihandahiyai iwitatamanitandihapa nini nusesi notaayo. ²⁶Jisaasihomi isihya Masetoniyahandaahiyauni Girisihandaahiyauni nehi kiyaisunyaapi Autaahaatihomi isihyaami usa ikipipa nawiho owehiyai Jerusaremihanda ikwiri numwitaatiwi nawiho nepi kiya ahoyawaayopo. ²⁷Sandi nehi sawanaunyaapi kiyawaayopo. Sawanaunyaapi kiyawaahandi kandi kiya isihya Judaahiyai gaahandi kawitaatiwi otipipatisahiyaare. Ami Judaahiya isihya usa kiyaami dawaataatihyai Autaahaatihomi gaahaiwa kiyai iwitatamanitandi nunyawihyaaso. Isi isihya Judaahiyaami ipaahaapihiya Judaahiyaanangi kiyaami maapi ikipipa nawiho nanyinyawi nandaatiwe. ²⁸Isi nini nawiho nesi nundi Jisaasihomi isihyai Jerusaremihanda nunyamapi samihihoaangihira napiti daindi jasomi Sipenihandaahapi naito. ²⁹Nini saindi niwahonini mmotinataayo, nini sangisenda nasataahura Kiraisihomi gaahandi tisaitahonini napito, sahi Jisaasihomi isihyaati Romihandaahiyaatangi nasamitando.

³⁰Naisihyaati Kiraisihopi nisataiwi giwunyaahohiyihyaate, nini sangi piwiha kima anditisaiti kasatataati nasisenataayo, nyami Awaisiho Jisasi Kiraisihomi watipihandaahuni ami nyahi maariho naminaati isihya usaisi maariho numwitahaahandi Itipihoni nanyamindihandaahuni nisapi gaapundiwise. Sahi nisapi waati ningisawi maasi Autaahaatiho ningi nitatamanitandi koai piwaundiwi gaapunditaatiwo. ³¹Sahi saiwi ningisawi gaapundiwise, isihya Judaahiya aunahipa Judiyahandaahiya Jisaasihomi piwiha windi atihomiwi kopi gimaawunyaahohiyihya ningi nepi namaanopisasito. Aisaihi ami Autaahaatihomi isihya Kiraisihopi giwunyaahohiyihya aunahipati Jerusaremihanda bimohiyihyai nini nawiho ikipipa kiyai iwitatamanitandihapa nesundunyanihi kiya maariho naasohitanihi maaritiwi kapa naito. ³²Saindi nunyamapi nisi sisiti aunihaindi maarititandihandi tisaitahonini sangisenda napito Autaahaatihomihandisi nanimaasi nasonaaho. Iyonihini nini sangisenda napisanihi mmotinaati maariho ambipati nga newaati witaati ikinaati usaimanindihaawo. ³³Isi nyahi napaisaati bimitihaahandami tanyaaho Autaahaatiho sangisati maasitane. Akite.

**Poriho Jisaasihomi Isihya Taahiyihyai
Ipihreti Gaahuraare Undataase**

16 ¹Nini Pimbihaatapi sandi kasatitandiyo, saati Pimbihaati nyamatiyati Kiraisihopi giwunyaahaati sangisenda nini neti

nandusoasataayo. Iyataati kaati Jisaasihomi isihya aunahipati witi Singiriyaahandaahiyai biyati iwitatamanihaate. Iyati kaati Jisaasihomi otipipatihaate. ²Siyahaatisi sahuni kaatuni maasi Jisaasihomi isihyaatisi komihya kiyohipatamataiwi kaati sahi maariho wiwipi numwaapise. Aiwi ami kaati wapaapi nenoahitonihangi sangi nasisehonihapa nunyawu iwitatamaniwise. Ami kaati itapaati nga iparihaati isihya taahiyihiyaisi iwitatamanati ami ningi maawi nitatamanahaatiso.

³Iyataati nisi maariho witi gwinyaahohitihanda nasasanyuri Prisiraayi Akwiraaya ningisami Kiraisi Jisaasihomi otipipati maawi kiyohisasanyuri maariho wiwiti gaahuraare unditi piwiha kima nusoasataayo. ⁴Kasanyuri ningi nitatamanitaatimi gwinyaamaami kasanyurami ambipati nopisasitaatimihandaatihi nesi nandaapihasanyure. Aihisandi nini kasanyuri awaindihandigaare undataato. Iyataati ninihigaare undataamaato. Jisaasihomi isihya Judaahiyaanami ipaahaapi dawaataati bimohiyihiyai maawi kasanyuri gaare undawaatopo. ⁵Jisaasihomi isihya kasanyurami anjipipihi ahoyaniwi aunihihiri katiwi Jisaasihoi mepi autaahepumahohiyihiyai maawi maariho wiwiti gaahure undataato. Aindi nisi naisoho Epiritaasiho yapipati Esiyaahandaahapi jihiyeyetati ko Kiraisihopi giwunyaasihoi nisi maariho nunyati gaahuraare undataato. ⁶Aindi ami Mariyaahaati samihatihisapi Jisaasihomi otipipati waati pihitatisaamaatisanginisi maariho witi hohitihanda gaahuraare undataato. ⁷Aindi ami niwahonisi utaahuri Judaahuri Andironaikaasiyi Juniyaasiyai maasi maariho wiwiti gaahuraare undataato. Iyataati suri utaasuri ningisami maasi Jisaasihomi ambipatapi isihya nepi yanyupapingwanaane. Iyataati kurami ambipati Jisaasihomi Aposerihiyaamihatihinganga noaipati ahotahure. Iyamaami Kiraisihopi nini sangi giwunyaahonihura Kiraisihopi kuri jihigiwunyaapi komihurimatimihure. ⁸Aindi ami nisi naisoho Ambiriyatusiho ningisati maasi Awaisihopi giwunyaati maaritihini nini koai maariho nunyohiho giwunyaataati gaahuraare undataato. ⁹Aindi ami ningisati maasi Kiraisihomi otipipati kaisiho nyami naisoho Uribanusihoi gaahuraare undataato. Aindi ami nisi naisoho ningisa maasi Kiraisihopi giwunyaasihini nisi maariho nunyohiho Sitakasihoi gaahuraare undataato. ¹⁰Aindi ami Aperisiho komi Kiraisihopi giwunyaasitihandikahapaamapipa nunjesihini aini anditititi bitohoi gaahuraare undataato. Aindi ami Arisitobiyuraasihomi isihiyai maawi gaahuraare undataato. ¹¹Aindi ami nini niwahonisi utaaho komi ambipati Erotiyonihoi gaahuraare undataato. Aindi ami Narisisaasihomi isihyaami usa noaipapi Autaahaatihomi isihyaaimatiwi nyami naisihiyai maawi gaahuraare undataato. ¹²Iyataati ami nini Tirapinaayi Tiraposaayi gaahuraare undataato, sapuri apopipuri Awaisihomi otipipati taami

kaimbipuriso. Aindi ami nisi naisaamaati Pesisihaati nini kaati apipaahi baindi maariho nunyohaamaati, Awaisihomi otipipati waati pihitati taati kaisaamaati gaahuraare undataato. ¹³Aindi Rupusiho Awaisihomi otipipati kaipati nga auta waati noaipasihoaisuni ami komi sanaati ningi biyati nasisoaari kaatami mwaahonisamatiyati nitatamanisaamaatisuni kindari gaahuraare undataato. ¹⁴Iyataati ami nini Asingiritaasihoisuni Pirekonihoisuni Erimisihoaisuni Patirombaasihoisuni Emasihoisuni ami usa kimikiyaisawi bimohiyihya nahatiya nisi ami nyami naisihya Kiraisihomi isihiyai gaahuraare undataato. ¹⁵Aindi ami Piroroakaasiyi Juniyaasiyaisuni Neriyaasihoisati komi sanaamaatisuni Orimbaasihoisuni ami siyaisawi maasi bimohiyihya nahatiya Autaahaatihomi isihiya usai maawi gaahuraare undataato. ¹⁶Iyataati sahi nahatiyaatangi nini sasatataato, sahi ninaasoni ami ninaasaani Autaahaatihomi gisunyaasirihireti geriniwi mmotiniwi gaahuraare niwise satataato. Iyonihi ami Kiraisihomi isihiya nahatiyaisangi sangi gaahuraare satawaatopo.

**Poriho Ipotiha Isihya Romihandaahiyai
Winihundati Jatiniwo Undataase**

¹⁷Iyataati nisi naisihyaati nisataiwi Kiraisihopi giwunyaahohiyihyaate, isihiya usa sangi nasispapi yiyandihepissamapi sami Kiraisihopi giwunyaahohitihandi nepi nasinjaapi nasopisasiwi ami nyahi Aposerihyaanini Jisaasihomi piwiha katawaasasonihi sahi atiwi nehohihai sehimpwapi kiyai wa isihiyai katiwunjohiyihyaapi sahi baiwi jatiniwo. Aiwi ami kiyaapi sahi yandih nawisawi bitosawise. ¹⁸Ami isiya siya saiwa siyohiyihya Kiraisiho nyami Awaisihomi otipipati kawisawaamaayopo, owetise. Ami nehi kiyai kiyaami ambipati gaundati gouseti nawiwaiwaapi otipipati kiyawaahiyaare. Iyataati kiya kiyaami piwiha sanihiha atipatisawi katiwi kiyohiwaiwaara isihiya ainahiyihyaami amitiha gwinyaahohiwaiwa nepi nusopisasiwi jaipundiwihiyaare. ¹⁹Iyataati sahi Autaahaatihomi piwiha Jisaasiho Katati kawaiwaapiha atiwi nepi kai andititiwi isiwahohitihandapi piwiha isihiya nahatiya aimi atisopo. Iyauhi sandapi nini sapi maaritataayo. Aindi ami nini sangi sasatataato, sahi gaahandi kaitaatiwihira daihira baiwi mmoniwise. Aiwi ami maipihapa kaitaatiwihira daihira sahi windi moniwi nehi nanihaiwi nanipimatiwise satiti kasatataato.

²⁰Iyataati Autaahaatiho nyahi nyami omanjititih napaisaatititihahandami tanyaaho, Bwaasirihiri neti keti tariwiyati sami auhiraapihi itipiwati isehamanamati koai sami otitihemaitaise. Iyonihi sahi koai ipatitaapo. Iyataati nini sapi saindi gisunyaati, nyami Awaisiho Jisaasiho sawahomunyaasirihiretapi sahi wapa kamaiwi nehihandi konihi sangi gaahandi kasisati jatatamanatoaatitandi gaapundataayo.

²¹Iyataati ningisati otipipati maasi kaisiho Timoteho sangi gaahuraare satataase. Aihi ami nini niwahonisi Judaahiya itingingwaasi Rusiyaasihouni Jesonihouni Sosipataahouni sangi maariho wisaiipi gaahuraare satawaatopo.

²²Iyataati nini Tetiyaasihonini Porihomi maahomwaanjapi piwiha neti sapi jipatipiyataayo. Saindi piwima Porihomi neti jipatipiyohimonini samataindi Kiraisihomihoninisi sangi gaahuraare satataato.

²³Gaiyaasiho ningisuni Kiraisihomi isihiyaisuni komi anjipipihi nanyamaati nyatatamasihi nanowaati bimaawaatuni ami ahoyanaati Kiraisihoai mepi autaaahewaumahaayo. Komi anjipipihi siyohiho sangi gaahuraare satataase. Aihi ami kimati aunahipati awaipati Korindihandami nawiho jatisiho Irasitaasihouni nyami naisoho Kiraisihopi nyangisati maasi giwunyaasiho Kwataasihouni sangi maariho wisaiipi gaahuraare satamaase.

²⁴Sahi wapa kamaiwi nehihandi sawahomunyaasitihandaahi nyami Awaisiho Jisasi Kiraisiho sangi gaahandi kasisati jatatanitandi nini sapi gisunyaati gaapisundataayo.

Nyahi Autaahaatihoai Newaati Mepi Autaaahewaumaitihaawo

²⁵Isi nyahi biyaati Autaahaatihoai mepi autaaahewaumaitihaawo. Jisasi Kiraisiho katati kaiwaiwaapiha piwiha nini ausaati kasatonini sahi atiwi nehohihetesamati sami Kiraisihopi giwunyaahohitihandi nga andititiwi isipi bitoaitatiwi Autaahaatiho sangi anditisaiwitaise. Sa piwa akaaha aimehuraapi utaarihandi noasandimi napinjati wani aimi neti auta ausaimanjinati noapasihini nini ausaahohihetesamati anditisaiwitaise. ²⁶Iyataati ami sa piwa apipaahi akaasa isihiya Autaahaatihomi piwa noasandiwaiwa kaundati nunjihi atiwi mmoniwi nepi jipatipiyohiwaiwaatihapi ausaimanjinatuni ami Autaahaatiho jinjapihi bimisiho piwiha watipihara isihiya yapihi nahatewaraahiyai neti ausaimanati nunjihi mmonawaayopo. Mmonawaawi Jisasi Kiraisihomihetapi isihiya nahatiya Autaahaatihopi giwunyaapi komi piwiha atiwiwi komi otitihini pinutaatiwo. ²⁷Iyataati Autaahaatiho so sawaho naasohihi apipaahi Autaahaatiho akoho kahapaamapipa kaitandihira nga biyati mmosihoai Jisasi Kiraisiho kaiwaiwetapi nyahi newaati jinjapihi kiyaaninihi mepi autaaahewaumaitihaawo. Apipaahi akiti akitinihi nyahi sandi kaitihaawo.